

四庫全書

子部

欽定四庫全書

子部
御定廣羣芳譜卷四

詳校官庶吉士臣汪彥博

員外郎臣牛稔文覆勘

覆校官庶吉士臣侍朝

校對官中書臣汪日章

謄錄監生臣陸維新

欽定四庫全書

御定佩文齋廣羣芳譜卷四

天時譜

夏

增禮記鄉飲酒義南方者夏夏之為言假也養之長之
假之仁也爾雅夏為朱明註氣赤而光明夏為長
羸戶子南方為夏夏興也南任也萬物莫不任興蕃
殖充盈也原梁元帝纂要夏曰朱夏炎夏三夏九夏

天曰昊天風曰炎風節曰炎節草曰茂草雜草木曰蔚
林茂林密樹茂樹

彙考增禮記王制夏薦麥 周禮秋官雉氏掌殺草春

始生而萌之夏日至而夷之 原晉書嵇康傳康性絕

巧而好鍛宅有一柳樹甚茂乃激水環之夏月居其上

以鍛 山海經朱提郡堂狼山多毒草盛夏之月飛鳥

過之亦不得去 淮南子武王陰暘人于柳下而天下

懷 增淮南子夏取果蓏注有核曰果無核曰蓏 薺

麥夏死而人曰夏生生者衆
尚書考靈曜夏火星昏

中可以種黍
原括地圖天毒國最熱夏則草木皆乾

語林陸機在洛夏月忽思東頭竹篠飲語劉寶曰吾

思鄉轉深矣
增敘聞錄嵇昌蓄採星盆夏月漬果則

倍冷
原杜陽雜編李輔國夏月堂中設迎涼草其色

碧榦似苦竹葉細於杉刺之牕戶間舉室皆涼
增熙

朝樂事西湖夏夜觀荷最宜風露舒涼清香徐細傷花

淺酌如對美人倩笑款語也
清閒供夏時晨起芰荷

為衣傷花枝吸露午後剗椰子杯浮瓜沉李搗蓮花飲
碧芳酒日晡浴罷掉小舟垂釣於古藤曲水邊薄暮簪
冠蒲扇立層岡看火雲變現
林下盟暑月晚涼浴罷
杖履逍遙臨池觀月乘高取風採蓮剥芡剖瓜雪藕白
醪三杯取醉而適其為樂殆未可以一二數也

集藻文賦散句增梁江淹四時賦炎雲峯起芳樹未移
臯蘭生坂朱荷出池憶上國之綺樹想金陵之蕙枝

唐王勃夏日登韓城門樓序驚花亂下戲鳥平飛荷葉

滋而曉露繁竹院靜而炎氣息
宋王炎夏日郊行賦

麥穰穰而餅餌桑陰陰而繭絲麻旆旆而没人秧芄芄
而布畦

五言古詩增
梁江總夏日還山庭獨於幽棲地山庭暗
女蘿澗漬長低篠池開半卷荷野花朝暝落盤根歲月
多停尊無賞慰狎鳥自經過
梁簡文帝納涼斜日晚

駸駸池塘生半陰避暑高梧側輕風時入襟落花還就
影驚蟬乍失林遊魚吹水沫神蔡上荷心翠竹垂秋采

丹棗映疎礎無勞夜遊曲寄此託微吟

隋薛道衡梅

夏應教長廊連紫殿細雨應黃梅浮雲半空上清吹隔
池來集鳳桐花散騰龜蓮葉開幸逢為善樂頻降濟時
才唐韋應物園亭覽物積雨時物變夏綠滿園新殘
花已落實高笋半成筠守此幽棲地自是忘機人宋

秦觀田居入夏桑柘稠陰陰翳墟落新麥已登場餘蠶
猶占箔隆曦破層陰霽霽收遠壑雌霓卧淪漪鮮飈泛
叢薄林深鳥更鳴水漫魚知樂羸老厭煩歎解衣屢磅

磚陰樹濯涼颺起行遺帶索冢婦餉初還丁男耘有託
倒筒備青錢鹽茗恐垂橐明日輸絹租鄰兒入城郭

七言古詩增宋歐陽修歸田樂南風原頭吹百草草木
叢叢茅舍小麥穗初齊稚子嬌桑葉正肥蠶食飽老翁
但喜歲年熟餉婦安知時節好野棠梨密啼晚鶯海石
榴紅轉山鳥田家此樂知者誰我獨知之歸不早乞身
當及強健時顧我蹉跎已衰老

原梅堯臣夏熱六龍

銜火燒寰宇魏王冰井若湯煮松枝桂葉凝若癡喘殺

溪頭嘯風虎北冥融却萬丈冰千觔凍鼠忙如蒸我聞
北土長飛雪此時日皦地皮裂仙芝瑤草不敢茁湘川
竹焦琅玕折西郊雲好雨不垂堆青疊碧徒爾為

增

元薩都刺新夏曲

紅泣香枯怨流水夜放籜龍千尺尾

風生宮樹曉層層涼綠一簾收不起煙乾寶鴨白晝清
祝融緩轡行且停薔薇花深霧冥冥碧牕睡起香滿肱

何中山中樂

隄柳綠搖新卷畫石榴紅摺嬌裙衩蓮

蕩風閒翡翠歌菱塘雨定鴛鴦下溪女浣紗朝出村行

官飲水暮歸舍瓦瓶手挈隔年醅石下坐圍明月夜山
中之樂誰得知我獨知之來何為空裏烏蟾飛影過桑
麻課效勝書帷 原鄭奎妻夏月詞芭蕉葉展青鸞尾
萱草花含金鳳嘴一雙乳燕出雕梁數點新荷浮綠水
困人天氣日長時鍼線慵拈午漏遲起向石榴陰畔立
戲將梅子打鶯兒

五言律詩增唐駱賓王夏日遊目暫屏塵囂累言尋物
外情致逸心逾默神幽體自輕浦夏荷香滿田秋麥氣

清詎假滄浪上將濯楚臣纓

夏日遊山家返照下層

岑物外狎招尋蘭徑薰幽佩槐庭落暗金谷靜風聲徹
山空月色深一遣樊籠累唯餘松桂心
杜審言夏日

過鄭七山齋共有樽中好言尋谷口來薜蘿山徑入荷
芰水亭開日氣含殘雨雲陰送晚雷洛陽鐘鼓至車馬
繫遲回
韋應物夏花明夏條綠已密朱萼綴明鮮炎

炎日正午灼灼火俱燃翻風適自亂照水復成妍歸視
窓間字熒煌滿眼前
許渾長興里夏日南鄰避暑侯

家大道傍蟬噪樹蒼蒼開鑊洞門遠下簾賓館涼欄圍
紅藥盛架引綠蘿長永日一欹枕故山雲水鄉

宋韓

琦夏景即事槐耳籠前檻雲峯透曲櫺涼風即崑閩煩
思入滄溟荷弱翻青蓋榴新倒綠餅晚來收驟雨一枕
夢魂醒

邵雍春盡後園閒步綠樹成陰日黃鶯對語

時小渠初激灑新竹正參差倚杖閒吟久攜童引步遲
好風知我意故故向人吹

張耒夏日過雨芰荷亂繁

陰竹樹多雛聲知鳥哺萍動見魚過細徑饒苔蘚陰墻

引薜蘿角中從倒側踈懶欲如何
蚓壤排晴圃蝸涎

印雨階花鬚嬌帶粉樹角老封苔
問字病多忘過鄰慵

却迴晚涼還盥櫛對竹引清杯
細徑依原僻茅蓬四

五家山田來雉兔溪雨熟桑麻
竹籠晨收果茅菴夜守

瓜頗知農事樂從此問生涯
金龐鑄喜夏小暑不足

畏深居如退藏青奴初薦枕黃
妳亦升堂鳥語竹陰密

雨聲荷葉香晚涼無一事步屨
到西廂明仁宗池亭

納涼夏日多炎熱臨池憩午涼
雨滋槐葉翠風過藕花

香舞燕來青瑣流鶯出建章
援琴彈野操民物樂時康
七言律詩增唐錢起避暑納涼
木槿花開畏日長時搖
輕扇倚繩牀初晴草蔓緣
新筍頻雨苔衣染舊牆十句
河朔應虛醉八柱天台好
納涼無事始知禪靜勝深垂
紗帳詠滄浪

宋陸游消暑小飲熟睡至暮桑落香浮

榭葉杯甘瓜綠李亦佳哉
虛堂頓解汗揮雨高枕俄成
鼻殷雷靜聽風聲生檻竹
徐看日影轉庭槐晚涼更動
扁舟興比渚紅蕖已半開
槐影桐陰欲滿廊綸巾羽

扇自生涼新篔玉溼陳雙楹平展風漪可一牀馳騎遠
分丹荔到大盆寒浸碧瓜香湖邊誰謂幽居陋也愛迨
迨夏日長

原明王象晉夏日祝融司令繼芳春四望

郊原樂事均翠浪翻池荷蓋綠黃雲布隴麥痕新榴花
焰焰紅噴火葵葉翩翩影應辰偃仰茂林逃酷暑呼朋
酌酒莫辭頻

五言排律增唐楊巨源夏日裴尹員外西齋看花笑向

東來客看花枉在前始知清夏月更勝艷陽天露濕呈

妝汗風吹畏火燃
蕊龍和葉盛爛熳
壓枝鮮紅綵當鈴
閣清香到玉筵
蝶棲鶯曙色鶯語
滯晴煙得地殊堪
賞
過時倍覺妍芳菲
遲最好唯是謝家
憐

五言絕句

御製橋望郊原浮麥氣
池沼漾青蘋
夏日臨橋望薰風處處

新

增金宇文虛中迴文翠
密園窓竹青圓貼水荷
睡多嫌
晝永醒少得風和
草徑迷深綠蓮池浴膩紅
早蟬鳴

樹曲鮮鯉躍潭東

七言絕句 增唐皮日休藥名離合夏日即事桂葉似茸

含露紫葛花如綬蘸溪黃連雲更入幽深地骨錄閒攜

相蠟郎 高駢山亭夏日 綠樹陰濃夏日長樓臺倒影

入池塘水精簾動微風起滿架薔薇一院香 宋司馬

光夏日西齋書事 榴花映葉未全開槐影沉沉雨勢來

小院地偏人不到滿庭鳥迹印蒼苔 范成大夏日田

園雜興 梅子金黃杏子肥麥花雪白菜花稀日長籬落

無人過惟有蜻蜓蛺蝶飛 五月吳江麥秀寒移秧披
絮尚衣單稻根科斗行如塊田水今年一尺寬 二麥
俱秋斗百錢田家喚作小豐年餅爐飯甑無饑色接到
西風熟稻天 晝出耘田夜績麻村莊兒女各當家童
孫未解供耕織也傍桑陰學種瓜 槐葉初勻日氣涼
蔥蔥鼠耳翠成雙三公只得三株看閒客清陰滿北窓
千頃芙蕖放棹嬉花深迷路晚忘歸家人暗識船行
處時有驚忙小鴨飛 采菱辛苦廢犁鉏血指流丹鬼

質枯無力買田聊種水近來湖面亦收租
楊萬里夏

日不但春妍夏亦佳隨緣花草是生涯
鹿葱解插纖長

柄金鳳仍開窠小花
戴冕夏晝小雨小牀
斬葦展琉

璃窗外新篁一尺圍正午雲橋陣雨過
冬青花上蜜蜂

歸
元僧善住夏日中庭日午橘花開
蜂蝶何知故故

來一陣南薰生殿角亂飄香雪點蒼苔
原明吳寬夏

日綠蔭松蘿暑氣涼清泉瀉入小池塘
人間畫永無聊

賴一朶荷花滿院香
增黃氏幼藻夏日深院塵消散

午炎篆煙如夢晝淹淹輕風似與荷花約為送香來自

捲簾

詩散句

增周庾信槐庭垂綠穗蓮浦落紅衣

陳徐陵

嫩竹猶含粉初荷未聚塵

隋李德林桐枝覆玉檻荷

葉滿銀塘

唐杜甫公子調冰水佳人雪藕絲

嚴維

蕙風清水殿荷氣雜天香

張籍竹月泛涼影萱露澹

幽叢

原宋邵雍夏木無重數叢陰翠樹低

秦觀新

麥已登場餘蠶猶占箔

增唐方干樹影興賒侵枕簟

荷香坐久著衣中 巖溜噴空晴似雨 林蘿礙日夏多

寒 宋陸游池塘澱澱荷浮葉 門巷陰陰筍放梢 元

方夔棟花零落魚初發 梅子青黃雨不乾 早麥熟隨

芹菜餉晚茶香和樹芽蒸 原蘇澹林塘乍迸翁孫竹

籬落齊開姊妹花 增晉謝朓夏木轉成帷 周庾信

夏餘花欲盡 唐韓偓暑退松篁健 李顥垂藤引夏

涼 李咸用雲水沉沉夏亦寒 宋陸游簷前桐影偏

宜夏

詞原宋秦觀如夢令門外綠陰千頃兩兩黃鸝相應睡
起不勝情行到碧梧金井人靜人靜風弄一枝花影

增明陳繼儒攤破浣溪紗梓樹花香月半明棹歌歸去
蟪蛄鳴曲曲柳灣茅屋矮挂魚罾笑指吾廬何處是

一池荷葉小橋橫燈火紙窓修竹裏讀書聲
原宋蘇

庠臨江仙獵獵風蒲初暑過瀟然庭戶秋清野航渡口

帶煙橫晚山千萬疊別鶴兩三聲秋水芙蓉聊蕩槳

一樽同破愁城蓼花灘上白鷗明暮雲連極浦急雨暗

長汀

明文徵明青玉案庭下石榴花亂吐滿地綠陰

亭午午睡覺來時自語悠揚魂夢黯然情緒蝴蝶過墻
去 駸駸嬌眼開仍帶悄無人欲出還凝佇團扇不搖
風自舉盈盈翠竹纖纖白苧不受些兒暑

別錄原芸窓類記凡收藏書畫於未梅雨前曬極燥頓

匣櫃中厚以紙糊門及小縫令不通風即不徵古人藏
書多用芸香即今之七里香也匣櫃須用楸梓杉杪之
類忌油松內不用漆 占候夏冰歲饑五穀不成 製

用夏月凡制一切果蔬俱用臘雪水最佳

四月 立夏小滿附見

增禮記月令孟夏之月日在畢昏翼中旦婺女中註日

月會於實沈而斗建己之辰也 王瓜生苦菜秀 命

野虞出行田原為天子勞農勸民毋或失時 農乃登

麥天子乃以彘嘗麥先薦寢廟 聚畜百藥靡草死麥

秋至 原梁元帝纂要是月曰孟夏亦曰首夏 增花

月令是月也杜鵑翔木香升新篁敷粉罌粟滿芍藥相

木筆書空

瓶史月表花盟主芍藥薜蘿夜合花客卿

石巖鴛粟玫瑰花使令刺牡丹粉團龍爪垂絲海棠虞

美人棟花

彙考原詩幽風四月秀萋

增夏小正四月圓有見杏

王荳莠取荼傳荼也者以為君薦蔣也

晉書樂志

四月之管名為仲呂者呂助也謂陽氣盛長陰助成功也 四月之辰謂為己己者起也物至此時畢盡而起也 四月官田其樹桃 孟夏之月以熟穀禾 律受

夾鍾夾鍾者種始莢也

四民月令四月可種黍謂之

上時

禮斗威儀孟夏驅獸無害五穀

秦中歲時記

長安四月已後自堂厨至百司厨通謂之櫻筍厨 高

僧傳摩訶利頭四月八日浴佛以都梁香為青色水鬱

金香為赤色水丘隆香為白色水附子香為黃色水安

息香為黑色水以灌佛頂也 景龍文館記四年四月

上幸司農少卿王光輔莊駕還朝後中書侍郎南陽岑

羲設茗飲葡萄漿與學士等討論經史 東坡詩註成

都太守自正月十日至四月十九日浣花乃止 水衡

記麥黃水四月水名 賞心樂事四月芳草亭鬪草芙

蓉池新荷蕊珠洞茶縻滿霜亭菊芽玉照堂青梅艷香

館長春花安閒堂紫笑羣仙繪幅樓前玫瑰餐霞軒櫻

桃詩禪堂盤子山丹花南湖雜花鷗渚亭五色鸞粟花

清閒供四月十四菖蒲誕 史纂馬珏居華陽亭墻

外有來禽一株枯已久矣師四月十四日汲水沃之曰

純陽來年是日生於此樹之下 帝京景物畧四月八

日捨豆兒曰結緣十八日亦捨先是拈豆念佛一豆佛號一聲有念豆至石者至日熟豆人徧捨之其人亦一念佛啖一豆也是月榆初錢麵和糖蒸食之曰榆錢糕

立夏增禮記月令是月也以立夏先立夏三日太史謂之天子曰某日立夏盛德在火天子乃齋立夏之日天子親帥三公九卿大夫以迎夏於南郊 三禮義宗

四月立夏為節夏大也至此之時物已長大故以為名說林立夏日俗尚啖李時人語曰立夏得食李能令

顏色美故是日婦女作李會取李汁和酒飲之謂之駐色酒一曰是日啖李令不疰夏

熙朝樂事立夏之日

人家各烹新茶配以諸色細果餽送親戚比鄰謂之七家茶富室競侈果皆雕刻飾以金箔而香茶名目若茉莉林擒桂蕊薔薇丁檀蘇杏盛以哥汝瓷甌僅供一啜而已

嘉吳記俗於立夏日啖青梅云令人終歲神清

不惛睡

小滿增孝經緯立夏後十五日斗指己為小

滿

物類相感志青梅過小滿黃蜀葵過小滿則長

集藻文賦散句原晉傅玄述夏賦四月惟夏運臻正陽

和氣穆而扇物麥含露而飛芒清微泛於琴瑟朱鳥感於炎荒鹿角解於中野草木蔚其條長梁昭明太子

錦帶書節屈朱明晷鍾丹陸依依聳蓋俱臨帝女之桑鬱鬱丹城並掛陶潛之柳梅風拂戶牖之內麥氣擁宮闕之前唐許敬宗麥秋賦葉幄垂秀條惟泛光鶯傳枝而孌娜蜂散蕊而芬芳對銀縠而偶穉並金縷而分芒改炎炎之鑠石若慄慄之懷霜

五言古詩原晉陶潛讀山海經孟夏草木長遶屋樹扶
踈衆鳥欣有託吾亦愛吾廬既耕亦已種時還讀我書
窮巷隔深轍頗迴故人車歡言酌春酒摘我園中蔬微
雨從東來好風與之俱泛覽周王傳流觀山海圖俯仰
終宇宙不樂復何如

增梁簡文帝和湘東王首夏冷

風雜細雨垂雲助麥涼竹水俱蔥翠花蝶兩飛翔燕泥
含復落鷓吟斂更揚卧石藤為纜山橋樹作梁欲待華
池上明月吐清光

唐劉禹錫初夏曲時節過繁華陰

陰千萬家巢禽命子戲園果墜枝斜寂寞孤飛蝶窺叢
寃晚花
白居易首夏南池獨酌春盡雜英歇夏初芳
草深薰風自南至吹我池上林綠蘋散還合潁鯉跳復
沈新葉有佳色殘鶯猶好音依然謝家物池酌對風琴
慙無康樂作秉筆思沈吟境勝才思劣詩成不稱心

宋梅堯臣孟夏二日通判太博惠庭花前日已春盡夏
卉抽嫩青唯君所植花餘紅猶滿庭常惜畏景逼贈未
及飄零欲插為之醉但慙髮星星

七言古詩原唐李賀四月樂詞曉涼暮涼樹如蓋千山
濃綠生雲外依微香雨青氛氲膩葉蟠花照曲門金塘
開水搖碧漪老景沈重無驚飛墜紅殘萼暗參差

五言律詩

御製夏日迎薰亭苑啓時初夏亭陰午未闌雨過池藻碧日
綻海榴丹水木含清景禽魚得靜觀薰風能解愠試取玉
琴彈 夏日郊行節變春方去清和助麥秋蔚林乘早夏
茂草接新流柳絮隄邊起荷錢水上浮風光殊舊日此意

未曾休

初夏玉泉山二首別館依丹麓疎簾映碧莎泉

聲當檻出花氣入垣多路轉溪橋接舟沿石竇過薰風能
阜物藻景已清和 山翠引鳴鑣湖光漾畫橈野雲低隔
寺沙柳暗藏橋百轉黃鸝近雙飛白鷺遙今年農事早時
雨足新苗

增唐韋應物始夏南園思舊里夏首雲物變雨餘草木

繁池荷初貼水林花已掃園繁叢蝶尚亂依閣烏猶喧
對此殘芳月憶在漢陵原 白居易早夏遊平泉廻夏

早日初長南風草木香肩輿頗平穩澗路甚清涼紫蕨
行者探青梅旋摘嘗療饑兼解渴一盞冷雲漿

宋司

馬光首夏呈諸鄰首夏木陰薄清和自一時筍抽八九
尺荷生三四枝新服裁蟬翼舊扇拂蛛絲莎徑熱未劇
晨昏來徃宜

陸游幽居初夏梅塢青黃子草陂紅紫

花雙鶯朝戲浦羣鴨暮還家赤脚挑殘筍蒼頭摘晚茶
出門逢野老滿意說桑麻

元白珽餘杭四月四月餘

杭道一晴生意繁朱櫻青豆酒綠草白蕪村水滿船頭

滑風輕袖影翻幾家蠶事動寂寂畫門關
明陳憲章

四月四月陰晴裏山花落漸稀雨聲寒月桂日色煖
醱病起初持酒春歸尚掩扉午風吹蛺蝶低趁乳禽飛
生意日無涯乾坤自不知受風荷柄曲擎雨柏枝垂
靜坐觀羣妙聊行覓小詩臨階愛新竹抽作碧參差

七言律詩原唐皮日休四月十五日和陸龜蒙道室書
事望朝齋戒是尋常靜啓金根第幾章竹葉飲為甘露
色蓮花鮓作肉芝香松膏背日凝雲磴丹粉經年染石

牀剩欲與君終此志頑仙惟恐鬢成霜

宋蔡襄四月

池上風下平池水暈開池邊露坐水風來草香苒苒生
吟席雲影飛飛度酒杯荷葉偶成雙翠蓋荔枝纔似小
青梅人閑物靜兩相得月色蒼涼始肯迴

陸游初夏

閒居城上朱旗夏令初溪頭綠水蘸菰蒲花貪結子無
遺萼燕接飛蟲正哺雛簫鼓賽蠶人盡醉陂塘移稻客
相呼長安青蓋金羈馬也有農家此樂無

戴曷四月

即景茶歌繞了又田歌節物真成一鳥過蒼竹颭風涼

意足碧梧留雨夜聲多
瓜緣茅屋抽長蔓
藕過蔬畦出
矮荷最喜白鷗相狎
久對人自在浴清波
真山民初
夏一葉薰風帶暑回
雨天濃翠與庭槐
不隨春去鶯猶
在好競時妝
榴又開
剪尺旋裁新白苧
杯盤聊薦舊青
梅篋中敝扇投閒久
依舊團團入手來

五言排律
增唐太宗賦得夏首啓節
北闕三春晚
南榮
九夏初黃鶯弄
漸變翠林花落餘
瀑流還響谷猿啼
自應虛早荷
向心卷長楊
就影舒
此時歡不極
調軫坐相

於白居易春末夏初閒遊江郭二首閒出乘輕屐徐

行蹋軟沙觀魚傍湓浦看竹入楊家林迸穿籬笋藤飄
落水花雨埋釣舟小風颺酒旗斜嫩剝青菱角濃煎白
茗茶淹留不知夕城樹欲棲鴉柳影繁初合鶯聲澀

漸稀早梅迎夏結殘絮送春飛西日韶光盡南風暑氣
微展張新小簟熨帖舊生衣綠蟻杯香嫩紅絲繪縷肥
故園無此味何必苦思歸首夏猶清和聯句記得謝

家詩清和即此時

白居易

餘花數種在密葉幾重垂裴芳

謝人人惜陰成處處宜

劉禹錫

水萍爭點綴梁燕共追隨

白行式

亂蝶憐踈蕊殘鶯戀好枝

張籍

草香殊未歇雲勢漸

多奇

白居易

單服初寧體新篁已出籬

裴度

與春為別近覺

日轉行遲

劉禹錫

繞樹風光少侵階苔蘚滋

白行式

唯思奉

歡樂長得在西池

張籍

七言絕句

御製夏日閒坐雲斂風微紫燕飛春光已去夏初歸清襟羸
得天然處暗覺花香到玉扉

增宋司馬光初夏首夏清和新雨晴綠莎細軟不妨行
園夫遮道白何事梔子花開班笋生
王安石初夏即

事石梁茅屋有薜碕流水濺濺度兩陂晴日煖風生麥
氣綠陰幽草勝花時
東陂荷葉初開筍漸抽東陂南

蕩正堪遊無端隴上脩脩麥橫起寒風占作秋
陳造

早夏安石榴花猩血鮮涼荷高葉碧田田鱒魚入市河
豚罷已是江南打麥天
范成大初夏四首清晨出郭

更登臺不見餘春只麼回桑葉露枝蠶向老菜花成莢

蝶猶來 晴絲千尺挽韶光
百舌無聲燕子忙
永日屋頭槐影暗
微風扇裏麥花香
東君不解惜芳菲
料峭寒中一夢非
翦盡牡丹梅子綻
何須風雨送春歸 一

簾芳樹綠
蔥蔥蝴蝶飛來
覓綺叢雪白
荼蘼紅寶相尚
攜春色見薰風
陸游初夏
紛紛紅紫已成塵
布穀聲

中夏令新
夾路桑麻行不盡
始知身是太平人
槐柳成陰
雨洗塵櫻桃酪乳
併嘗新
古來江左多佳句
夏淺勝春
寂可人
楊萬里初夏
麥黃秧碧
百家衣已熟
猶

寒四月時雨後寬春無一寸薔薇花發釀燕脂 手種

琅玕劣十年今年新笋不勝繁不知明早添多少日暮

閒來數一番 戴敏遊張園 乳鴨池塘水淺深熟梅天

氣半晴陰東園載酒西園醉摘盡枇杷一樹金

詩散句增晉謝靈運首夏猶清和芳草亦未歇 原謝

眺麥候始清和涼雨消炎燠 唐太宗一朝春夏改隔

夜鳥花遷 增張說庭柳餘春駐宮櫻早夏催 原杜

甫摘荷纔首夏驄馬尚餘春 錢起花萼敗春多寂寞

葉陰迎夏已清和

宋謝伯初園林換葉梅初熟池館

無人燕學飛

蘇軾

吳國晚蠶初斷葉占城早稻欲移

秧

陸游采茶歌裏春光老煮繭香中夏景長

風和

柳岸吹綿後雨足瓜畦引蔓時

梅子生仁已帶酸棟

花墮地尚微寒

詞原明陳繼儒攤破浣溪沙蜂欲分衙燕補巢清和天

氣綠陰嬌一陣窓前風雨到打芭蕉驚起幽人初睡

午茶煙繚繞出花梢有箇客來琴在背度紅橋

葉夢

得黃金縷睡起流鶯語掩蒼苔房櫳向曉亂紅無數吹
盡殘花無人問惟有垂楊自舞漸煖靄初回輕暑寶扇
重尋明月影暗塵侵尚有乘鸞女驚舊恨鎮如許江
南夢斷衡臯渚看黏天蒲菰漲綠半空煙雨無限樓前
滄波意誰採蘋花寄取空惆悵蘭舟容與萬里雲帆何
時到送孤鴻目斷千山阻誰為我唱金縷

別錄原占候月內有三卯宜麻無則麥不收月內寒主
早諺云黃梅寒井底乾諺云有穀無穀且看四月十

六立一丈竿量月影月當中時影過竿雨水多沒田夏
旱人饑長九尺主三時雨水八尺七尺主雨水六尺低
田大熟高田半收五尺主夏旱四尺蝗三尺人饑

增

農政全書分龍之日農家於是日早以米篩盛灰藉之
紙至晚視之若有雨點迹則秋不熟穀價高人多閉糶
諺云二麥不怕神共鬼只怕四月八日雨大抵立夏
後雨多便損麥蓋麥花夜吐雨多花損

種植秋王瓜

麥門冬芝麻蘿蔔扁豆粟紫蘇菱芡小豆絲瓜枇杷蔥

瑞香芡

移植

石菖蒲櫻桃茄秋海棠茉莉梔子秋牡

丹枇杷慈翠雲草荊芋

壓插

玉繡球木樨梔子錦葵

玉蝴蝶木香荼蘼芙蓉

收採

豨薟草白蘚根菜子析

冥子桃杏仁蠶豆狀胡筍乾楮實黃葵花蒼耳子紅花

蕤仁桑椹

整頓

防露傷麥翦菖蒲鋤葱素馨斫楮皮

埋蠶沙伐樹絡麻

田忌

天火酉九焦未地火未糞忌

寅荒蕪申

五月

芒種夏至端午附見

增禮記月令仲夏之月日在東井昏亢中旦危中註日

月會於鶉首而斗建午之辰也 農乃登黍天子乃以

雛嘗黍羞以含桃先薦寢廟令民毋艾藍以染 半夏

生木堇榮 原梁元帝纂要五月曰仲夏亦曰暑月臯

月 花月令是月也葵赤紫薇葩薜蘿始馨夜合交榴

花照眼紫椹降於桑 增瓶史月表五月花盟主石榴

番萱夾竹桃花客卿蜀葵洛陽花午時紅花使令川荔

枝梔子花火石榴孩兒菊一丈紅石竹花

彙考增周禮秋官仲夏斬陰木註陰木秋冬生者若松

柏之屬夏小正五月乃衣瓜傳瓜者急瓜之辭也瓜

者始食瓜也初昏大火中種黍菽糜煮梅蓄蘭傳大

火者心也心中種黍菽糜時也煮梅為豆實也蓄蘭為

沐浴也晉書樂志五月之辰謂為午午者長也大也

言物皆長大也五月之管名為蕤賓歲蕤垂下貌也

賓敬也謂時陽氣下降陰氣始起相賓敬也風俗通

五月落梅風江淮以為信風風土記五月有霖霖號

為梅雨露衣皆敗謂之送梅雨

歲時雜記仲夏多大

雨名濯枝雨

水衡記

五月瓜蔓水五月瓜延蔓故以

名

夢溪筆談

五月草木茂盛逾於初生故曰勝先

賞心樂事五月聽鶯堂摘瓜重午節泛蒲煙波觀碧蘆

南湖萱花綺亙亭火笑花水北書院采蘋鷗渚亭五色

蜀葵清夏堂楊梅叢奎閣榴花艷香館林檎摘星軒枇

杷

清閒供五月十三竹醉日

芒種增嬾真子錄陝

州夏縣士人樂舉明遠嘗云二十四氣其名皆可解獨

小滿芒種說者不一僕因問之明遠曰皆為麥也小滿
四月中謂麥之氣至此方小滿而未熟也芒種五月節
種該數類之種謂種之有芒者麥也至是當熟矣僕因
記周禮稻人澤草所生種之芒種註云澤草之所生其
地可種芒種芒種稻麥也僕近為老農始知過五月節則稻
不可種所謂芒種五月節者謂麥至是而始可收稻過
是而不可種也古人名節之意所以告農候之早晚深
哉 夏至增周禮秋官柞氏掌攻草木及林麓夏日至

令刊陽木而火之疏夏日至謂五月夏至之日為之也

令刊陽木而火之謂先削以去其皮乃燒之管子夏

至而麥熟天子祀太宗其盛以麥穀之始也荆楚歲

時記夏至日食稷取蔴為灰以止小麥索按干寶變化

論云朽稻為蠹朽麥為蚨蝶此其驗乎風土記夏至

前芒種後雨為黃梅雨田家初插秧謂之發黃梅端

午增玉燭寶典洛陽人家端午造术羹艾酒以花絲作

樓閣插鬢贈遺辟瘟扇荆楚歲時記五月五日四民

並蹋百草又有鬪百草之戲採艾為人懸門戶以禳毒
氣按宗則嘗以五月五日鷄未鳴時採艾見似人處攬
而取之用灸有驗 是日競渡採雜藥 風土記端午

烹鶩進筒糴一名角黍以菰葉裹黏米栗棗以灰煮令
熟蓋取陰陽包裹未散之象 千金月令端午以菖蒲

或鏤或屑以泛酒 採蘭雜志杜羔妻趙氏每歲端午

午時取夜合花置枕中羔稍不樂輒取少許入酒令婢
送飲羔即歡然當時婦人爭效之 酉陽雜俎五月進

五時圖五時花施帳之上

歲時雜記端午刻菖艾為

小人子或葫蘆形帶之辟邪

吳中歲時記端午簪艾

葉榴花以辟邪

乾淳歲時記端午禁中插食盤架設

天師艾虎意思山子數十座五色蒲絲百草霜以大盒

三層飾以珠翠葵榴艾花蜈蚣蛇蝎蜥蜴等謂之毒蟲

又以大金瓶數十遍插葵榴梔子花環繞殿閣及分賜

后妃諸閣大璫近侍翠葉五色葵榴金絲翠扇真珠百

索釵符經筒香囊軟香龍涎佩帶及紫練白葛紅蕉之

類大臣貴邸均被細葛香羅蒲絲艾朶彩團巧粽之賜而外邸節物大率效尤焉

熙朝樂事端午為天中節

家家買葵榴蒲艾植之堂中或採百草以治藥品

東

京夢華錄端午節物百索艾花銀樣鼓兒花花巧畫扇香糖果子糉子白團紫蘇菖蒲木瓜並皆葺切以香藥相和用梅紅匣子盛裹自五月一日及端午前一日賣桃柳蒲葉葵花佛道艾次日家家鋪陳於門首與糉子五色水團茶酒供養又釘艾人於門上士庶迎相宴賞

歲華紀麗譜五月五日宴大慈寺設廳醫人鬻艾道人賣符朱索綵縷長命辟災之物筒飯角黍莫不咸在

遼志

五月五日午時採艾葉與綿相和絮衣七事國

主著之臣僚各賜艾衣三事國主及臣僚飲宴渤海厨子進艾糕各點大黃湯下北呼此時為討賽離又以雜絲或綠結合歡索纏於臂膊婦人進長命縷宛轉皆為人像帶之

集藻文散句原魏文帝與吳質書蕤賓紀時景風扇物

天氣和煖衆果具繁

梁昭明太子錦帶書麥隴移秋

桑律漸暮蓮花泛水豔如越女之顛蘋葉漂風影亂秦
臺之鏡炎風以之扇戶暑氣於是盈樓凍雨洗梅樹之
中火雲燒桂林之上

五言古詩

增

周庾信奉

和夏日應令

朱簾捲麗日翠幕

蔽重陽五月炎氣蒸三時刻漏長麥隨風裏熟梅逐雨
中黃開冰帶井水和粉雜生香衫含蕉葉氣扇動竹花
涼早菱生軟角初蓮開細房願陪仙鶴舉洛浦聽笙簧

宋陸游時雨時雨及芒種四野皆插秧家家麥飯羹
處處菱歌長老我成惰農永日付竹牀衰髮短不櫛愛
此一雨涼庭木集竒聲架藤發幽香鷲衣濕不去勸我
持一觴卽今幸無事海際皆農桑野老固不窮擊壤歌

虞唐

七言古詩增宋陸游怡齋東湖仲夏草樹荒屋古無人
亭午涼萱房微呀不見日筭籜自解時吹香野藤蟠屋
入窓罅濕茵扶踈生屋梁跨溝數椽寂幽翳漲水及檻

雨敗牆靜涵青蘋舞藻行間立白鷺浮鴛鴦芙蓉雖瘦
亦瀾漫照眼翠蓋遮紅妝水紋珍簟欲卷却團團素扇
嬾復將天風忽送塔鈴語喚覺清夢遊瀟湘

五言律詩

御製午日令序當重午南臺日正中玉階鳴瀑水瑤軫奏薰

風菖葉浮杯綠榴花照檻紅臨流看競渡轉憶濟川功

途次端午蕤賓逢夏律午日俯澄流黃鳥林中變新蒲岸

外稠宮筵傳綵糴仙酒泛丹榴遙憶蓬萊上垂楊蔭御溝

增宋陸游重五重五山村好榴花忽已繁糶包分兩髻
艾束著危冠舊俗方儲藥羸軀亦點丹日斜吾事畢一
笑向杯盤

七言律詩原唐李德裕嶺南道中嶺水爭分路轉迷枕
椰柳葉暗蠻溪愁衝毒霧逢蛇草畏落沙蟲避燕泥五
月畬田收火米三更津吏報潮雞不堪腸斷思鄉處紅
槿花中越鳥啼

增元成廷珪夏日過萬蓬菴愛汝東
菴暑氣薄解衣盤礴坐莓苔一林綠竹盡可數五月白

蓮猶未開捉麈談禪知獨往買魚沽酒待重來滄江日
落山更好且放輕舟緩緩迴

明虞堪午日訪沈元圭

席上次韻一簾葵錦爛晴霞五色絲虹映臂紗玄藥自
消頭上雪絳榴誰插鬢邊花茶烹石鼎從施禁詩寫蠻
箋學破邪不是西山黃石叟難逢東老地仙家

原何

景明午日五月五日天氣鮮艾葉榴花對眼前鄉土歲
時殊不惡閭閻風俗自堪憐鄰人角黍能相送野老蒲
觴得共傳回首十年車馬地每逢佳節淚潛然

文徵

明仲夏有懷五月江南櫻筍殘
疎花吹盡綠漫漫雨來却及梅黃
候春去猶餘麥秀寒白日幽深
茆屋靜野情蕭散苧袍寬美人何處經時別滿耳新蟬獨倚闌

五言絕句

增

宋蘇軾端午皇帝閣帖子詞採秀擷羣芳

爭儲百藥良太醫初薦艾庶草驗蕃昌

皇太妃閣端

午帖子詞雨細方梅夏風高已麥秋應憐百花盡綠葉

暗紅榴

太皇太后閣端午帖子詞日永蠶收簇風高

麥上場朝來藉田令菰黍獻時芳

夫人閣端午帖子

詞肅肅槐庭午沈沈玉漏稀
皇恩樂佳節鬪草得珠璣
六言絕句增宋鼂補之仲夏即事
紅葵有雨長穗青棗
無風壓枝濕礎人霑汗際蒸
林禪烈號時

七言絕句增宋王安石五月與和叔同遊齊安繅成白
雪桑重綠割盡黃雲稻正青
他日玉堂揮翰手芳時同

此賦林垆

蘇軾皇太后閣端午帖子詞祕殿扶踈夏

木深雨餘初有一蟬吟應將羸女乘鸞扇更助南風長
棘心 上林珍木暗池臺蜀產吳包萬里來不獨盤中

見盧橘時於糶裏得楊梅
皇太妃閣端午帖子詞玉

盆沈李灑清泉金鴨噓空裊細煙自有梧楸障畏日仍

欣麥黍報豐年
陸游重午葉底榴花感絳繒街頭初

賣苑池冰世間各自有時節蕭艾著冠稱道陵
原僧

道潛臨平道中春蒲獵獵弄輕柔欲立蜻蜓不自由五

月臨平山下路藕花無數滿汀洲
增金趙秉文夏至

玉堂睡起苦思茶別院銅輪碾露芽紅日轉階簾影薄

一雙蝴蝶上葵花
馬定國村居五月南風化蟋蟀野

塘晚筍未成蒲檉花落盡紅英細沙渚鴛鴦半引雛

元廼賢月湖竹枝詞五月荷花紅滿湖團團荷葉綠雲

扶女郎把釣水邊立折得柳條穿白魚

詩散句原唐李白大火五月中景風從南來數枝石榴

發一丈荷花開五月梅始黃蠶稠桑柘空山花異

人間五月雪中白增宋李邦直艾葉成人後榴花結

子初唐陳羽池上樓臺五月涼百花開罷水芝香

方干長潭五月來冰氣孤檜中宵學雨聲宋章得象

五日看花憐並蒂今朝鬪草正宜男
花陰轉午清風

細玉燕釵頭艾虎輕
陸游瓜蔓水生初抹岸梅黃雨

細欲遮樓
戴復古海榴花上雨蕭蕭自切菖蒲泛濁

醪
元周權人家綠艾端陽節天氣黃梅雨細時
顧

瑛梧竹一庭涼欲雨池臺五月氣涵秋
明唐順之榴

吐千花承雨蓋莫開五葉拂瑤墀
唐韓翎寒水浮瓜

五月時
薛能槐柳陰陰五月天
宋王珪瑤墀九御

薦菖華
秦觀菑菑吹風五月秋
章得象菖蒲泛酒

堯樽綠 元馬士熙曲闌五月櫻桃紅

詞原宋蘇軾阮郎歸綠槐高柳咽新蟬薰風初入絃碧

紗窓下水沈煙碁聲驚晝眠 微雨過小荷翻榴花開

欲然玉盃纖手弄清泉瓊珠碎又圓 吳禮之喜遷鶯

梅霖初歇正絳色海榴爭開佳節角黍包金香蒲切玉
是處玳筵羅列鬪巧已輸年少玉腕綵絲雙結艤畫舫

見龍舟兩兩波心齊發 奇絕難畫處激起浪花翻作

湖間雪畫鼓轟雷紅旗掣電奪寵錦標方徹望中水天

日暮猶自珠簾高揭棹歸晚載荷香十里一鉤新月
增劉克莊賀新郎思遠樓前路望平隄十里湖光畫船
無數綠蓋盈盈紅粉面葉底荷花解語關巧結同心雙
縷尚有經年離別恨一絲絲總是相思處相見也又重
午清江舊事傳荆楚歎人情千載如新尚沈菰黍且
盡樽前今日醉誰肯獨醒弔古泛幾盞菖蒲綠醕兩兩
龍舟爭競渡奈珠簾暮捲西山雨看未足怎歸去

別錄原占候博雅月內有三卯宜稻及大小豆無則宜

早豆 五月大種瓜不下五月小種秧必須早 五月

小瓜果吃不了 田家五行志夏至在月初主雨水調

諺云夏至端午前坐了種田年夏至在月中耽閣糶米

翁 夏至值甲寅丁卯粟貴 朔日值芒種六畜災值

夏至冬米大貴 十日得辰早禾半收十一日得辰五

穀不收 歲時記夏至在初二三主米麥貴初五米貴

諺云夏至連端午家家賣兒女初七八米麥平二十大

饑上旬米賤中旬大豐米大賤末旬大歉米大貴 便

民圖纂五月暴熱之時者窠草忽自枯死主有水種

植晚大豆夏蘿蔔黑豆黃豆晚菘菜赤豆菘豆瓜移

植枇杷月季荼蘼薔薇木香櫻桃石榴錦帶棠棣玉堂

春西河柳橘瑞香寶香素馨剪春羅竹橙收採菖蒲

蒜臺麥諸菜子馬齒莧青箱子卷栢藤花莧天茄苗白

花菜大小薊旋覆花紅花萱花杜仲蛇牀子馬蘭子酸

漿草黃柏槐花浮萍蒲公英益母草車前子金銀花天

麻艾水仙根豨薟草罌粟子麻黃澤瀉整頓割芋麻

斫桑枝糞桑採練葛

製用金門歲節重午日午時有

雨則急砍一竹竹節中必有神水瀝取和獺肝為圓治

心塊腹聚等病

田忌天火子地火酉荒蕪已九焦外

糞忌午

六月

伏附見

增禮記月令季夏之月日在柳昏火中旦奎中註日月

會於鶉火而斗建未之辰也 溫風始至 命澤人納

材葦 樹木方盛命虞人入山行木毋有斬伐

原花

月令是月也萱宜男鳳仙來儀菡萏百子凌霄登茉莉
來賓玉簪搔頭
增瓶史月表六月花盟主蓮花玉簪
茉莉花客卿百合山丹山礬水木樨花使令錦葵錦燈
籠長雞冠仙人掌頰桐鳳仙花

彙考原詩幽風六月食鬱及薺
增夏小正六月煮桃

傳桃也者拖桃也拖桃也者山桃也煮以為豆實也

晉書樂志六月之辰謂之未未者味也言時萬物向成
有滋味也 六月之管名為林鍾林者林茂也謂時物

茂盛於野也

雲仙雜記房壽六月召客坐湘竹簟凭

狐文几編香藤為俎刻柳子為杯搗蓮花製碧芳酒調
羊酪造含風酢皆涼物也

內觀日疏六月廿四日為

觀蓮節鼉采與其夫各以蓮子饋遺為歡

夢溪筆談

六月萬物小盛故曰小吉

暇日記六月山礬水

賞

心樂事

六月蒼寒堂後碧蓮碧宇竹林避暑芙蓉池賞

荷花約齋夏菊清夏堂新荔枝霞川食桃

吳郡記荷

花蕩在葑門之外每年六月廿四日遊人最盛畫舫雲

集露幃則千花競笑舉袂則亂雲出峽揮扇則星流月
映聞歌則雷輶濤趨蘇人遊冶之盛至是日而極矣

伏原四民月令初伏薦麥瓜於祖禰 東京夢華錄都

人最重三伏蓋六月中別無時節徃風亭水榭峻宇高
樓雪檻冰盤沈李浮瓜流杯曲沼芭鮓新荷遠邇笙歌
通夕始罷 增清閒供六月初伏薦麥瓜中伏碧筒勸
竹篠飲二十四日蓮誕

集藻文散句原梁昭明太子錦帶書三伏漸終九夏將

謝螢飛腐草光浮帳裏之書蟬噪繁柯影入機中之鬢
濯枝遷潦溢芳槿茂而發榮山土焦流金海水沸而漂
爍

五言古詩
增宋龜補之夏季夏季百果繁兔葵亦成實
獨有野石榴幽花時熠熠熠熠非獨好芳榮賴午日翩
翩彼白蜨髣髴采挹睡餘起對此嘉興亦蕭瑟良非
阡陌麗敢競陽春出無言以成蹊上愧桃李質幸當飽
霜餘萬顆富君室

七言古詩增宋蔡襄甲辰初伏快雨涼風晝眠初覺庭

前小欄花木各有意氣效栢梁體閏夏天氣熱燭烘崇

朝快雨隨清風晝軒夢覺開前櫳畫欄花草意氣雄側

枕遙聞數異同如此微物煩化工盍各言爾之所從繁

葩富豔生朱紅川海枯條大蕊千萬重緋修幹點綴赤

日中蜀蠲去憂忿誰與功萱採摘烹煮祛煩胸百秋霜

巨實垂如甕木橫柯遠引交加叢紅玫瑰葉抽綠劍端黃

茸山直立開披泉貨通金疊繞翠羽翻蚪龍辟誤入畦

町非余公

讀麻

助滌渴肺思匪躬

冬麥門

物物自名詞不窮

願當我意乃汝容負汝不飲慙衰翁

歐陽修初伏日

招王幾道小飲北園數畝宮墻下嗟我官居如傳舍滹

沱北渡馬踏水西山病歸花已謝落英不見空繞樹細

草初長猶可藉空園一鎖不復窺不覺芳蹊繁早夏隔

墻時時聞好鳥如得嘉客聽清話今朝試去繞園尋綠

李橫枝礙行馬蒲萄憶見初引蔓翠葉陰陰還滿架紅

榴寂晚子已繁猶有殘花藏葉罅人生有酒復何求官

事無了須偷暇古云伏日當早歸况今著令許休假能
來解帶相就飲為子埽月開風榭

七言律詩原唐王維積雨輞川莊作積雨空林煙火遲

蒸梨炊黍餉東菑漠漠水田飛白鷺陰陰夏木嘑黃鸝
山中習靜觀朝槿松下清齋折露葵野老與人爭席罷
海鷗何事更相疑 增宋韓琦六月六日雨後過嶽廟
遊從封寺觀稼暑雨頻經信宿休近郊方出釋潛憂雖
妨麥始二停獲且見苗知一半收神嶽怖民藏電電老

松憑寺偃蛟虬佳遊况遇從豐讖好節千倉待有秋

七言絕句原宋蘇軾西湖畢竟西湖六月中風光不與
四時同接天蓮葉無窮碧映日荷花別樣紅

詩散句增宋蘇軾遠郭荷花一千頃誰知六月下塘春
元龔璠六月涼如冰熨齒枇杷移陰碧書几 梁庾

信六月蟬鳴稻

詞原明陳繼儒浪淘沙風雨霎時晴荷葉青青雙鬢捧
著小紅燈報道綠紗廊底下蕉月分明 枕簟嫩涼生

茉莉香清蘭花新吐百餘莖撲得流螢飛去也團扇多情

別錄原占候六月無蠅主米價平諺云六月無蠅新舊相登三伏宜熱諺云六月不熱五穀不結蓋當槁稻之時又當下壅晴熱則苗旺涼雨則苗没立秋在晦旱

稻遲 種植秋赤豆秋菘豆豇豆蘿蔔胡蘿蔔素馨芥

菜晚瓜蔓青小蒜 壅培麥冬橙芋韭橘 灌溉菊牡

丹芍藥茉莉 收採花椒芋竹青箱子紫草槐花藕天

仙子蓮鬚蓮花松香杜仲鳳仙花莖菱科苜蓿蓮房茅
根乾漆藿香白芷葛菟菜葦草茵郁李根野白薺地踏
菜燈草旋覆花眼子菜澤瀉 整頓鋤竹園漚麻耕麥
地製用洽聞記日濟國西南海中有三島各相去數
十里其島出黃漆似中夏漆樹彼土六月破樹腹取汁
以漆器物若黃金其光奪目 田忌天火卯九焦子糞
忌子地火已荒蕪辰

御定佩文齋廣羣芳譜卷四

欽定四庫全書

子部

御定廣羣芳譜卷五

詳校官庶吉士臣汪彥博

員外郎臣牛稔文覆勘

覆校官庶吉士臣侍朝

校對官中書臣汪日章

謄錄監生臣陸維新

欽定四庫全書

御定佩文齋廣羣芳譜卷五

天時譜

秋

增禮記鄉飲酒義西方者秋秋之為言愁也爾雅秋

為白藏注氣白而收藏秋為收成尸子西方為秋

秋肅也萬物莫不禮肅也原梁元帝纂要秋曰三秋

九秋素秋素商高商天曰旻天風曰商風素風淒風高

風涼風激風悲風景曰朗景澄景清景時曰淒辰霜辰
節曰素節商節草曰荒草木曰疎木衰林霜柯霜條

彙考原易兌卦兌正秋也萬物之所說也 詩小雅秋

日淒淒百卉具腓 增管子秋至而禾熟天子用祀於

大慈 淮南子秋風下霜倒生挫傷注草木首地而生

故曰倒生挫傷者凋落也 秋畜蔬食注菜蔬曰蔬穀

食曰食 三統歷說秋為陰中萬物以成 原羯鼓錄

明皇製秋風高曲每奏之則清風徐來夜葉交墜 增

清閒供秋時晌午用蓮房洗硯理茶具拭梧竹午後戴
白接羅著隱士衫望紅樹葉落得句題其上薄暮焚香

壅菊

集藻文賦散句原楚屈原九歌嫋嫋兮秋風洞庭波兮
木葉下 宋玉九辨悲哉秋之為氣也蕭瑟兮草木搖

落而變哀僚慄兮若在遠行登山臨水兮送將歸次寥
兮天高而氣清寂寥兮收潦而水清 皇天平分四時

兮竊獨悲此凜秋白露既下降百草兮奄離披此梧楸

漢東方朔七諫秋草榮其將實兮微霜下而夜降商

風肅而害生兮百草育而不長
晉潘岳秋興賦耕東

臯之沃壤兮輸黍稷之餘稅泉涌湍于石間兮菊揚芳

乎崖溪
湛方生秋夜賦悲九秋之為節物凋悴而無

榮嶺頽鮮而隕綠木傾柯而落英
宋沈勃秋羈賦菊

圖縟于園沼橘倒節于池側草改貌而傾蕢林伐狀而

搖蒂潭斂氣而威荷露危光而嚴蕙
梁元帝秋興賦

洞庭之葉初下塞外之草前衰
秋風搖落辭秋風起

兮寒鴈歸寒蟬鳴兮秋草腓萍青兮水澈葉落兮林稀
翠為蓋兮玳為席蘭為室兮金作扉水周兮曲堂花交
兮洞房樹參差兮密稍紫荷紛披兮疏且黃 唐王勃

秋夜山亭宴集序 紅蘋綠苕亘渚連翹玉帶瑤華分欄

間植池簾夕敞香牽十步之風岫幌宵寒氣襲三危之

露 李白悲清秋賦 荷花落兮江色秋風嫋嫋兮夜悠

悠臨窮溟以有羨思釣鰲于滄洲 劉禹錫秋聲賦 松

竹含韻梧楸早脫驚綺疏之晚吹墜碧砌之涼月 黃滔

秋色賦跋烏減赫顧兔添明池上落紅蕖之態煙中吟
玉笛之聲秦華峰高染蓮花而翠活湘川樹老換楓葉
以丹生愈碧高山徧清漢水松柏風高兮歲寒出梧桐
蟬急兮煙翠死

五言古詩原晉江道詠秋祝融解炎轡蓐收起涼駕高
風催節變凝露督物化長林悲素秋茂草思朱夏鳴鴈
薄雲嶺蟋蟀吟深榭寒蟬向夕號驚颺激中夜感物增
人懷悽然無欣暇

宋劉鑠秋歌旻天清且高秋風發

初涼白露下微津
明月流素光凝煙
汎城闕淒風入軒
房朱華先零落
綠草就芸黃
織羅還笥篋
輕紉改衣裳

鮑照詠秋

秋蘭徒晚綠
流風漸不親
飈我垂憫
暮驚

此梁上塵沉陰安可久
豐景將遂淪何由忽
靈化暫見

別離人

增周庾信秋日蒼茫望
落景羈旅對窮秋
賴

有南園菊殘花足解愁

原庾信遊昆明池秋光麗晚

天鷁舸泛中川
密菱障浴鳥高荷
沒釣船碎珠縈
斷菊殘絲繞折蓮
落花推十酒
栖鳥送一絃
唐太宗度秋

夏律昨留灰秋箭今移晷峩嶺岫初出洞庭波漸起桂
白發幽巖菊黃開灞涘運流方可歎含毫屬微理 增

李白秋思春陽如昨日碧樹鳴黃鸝蕪然蕙草暮颯爾
涼風吹天秋木葉下月冷莎鷄悲坐愁羣芳歇白露凋
華滋 王昌齡秋興 日暮西北堂涼風洗修木著書在

南牕門館常肅肅苔草延古意視聽轉幽獨或問余所
營刈黍就寒谷 白居易早秋曲江感懷 離離暑雲散
嫋嫋涼風起池上秋又來荷花半成子朱顏易銷歇白

日無窮已人壽不如山年光急于水青蕪與紅蓼歲歲
秋相似去歲此悲秋今我復來此
新秋西風飄一葉

庭前颯已涼風池明月水衰蓮白露房具奈江南夜綿
綿自此長
溫庭筠秋日
爽氣變昏旦神臯徧原隰煙

華久蕩搖石澗仍清急柳闇山犬吠蒲流水禽立菊花
明欲迷東葉光如濕天籟思林嶺車塵倦都邑壽張夙
所違悔怯何由入芳草秋可藉幽泉曉堪汲牧羊燒外
鳴林果雨中拾復此遂閒曠脩然脫羈紲田收鳥雀喧

氣肅龍蛇蟄佳節足豐穰良朋阻遊集沉機日寂寥葆
素常呼吸投迹倦攸往放懷志所執良時有東菑吾將
事蓑笠

宋歐陽修秋晚凝翠亭黃葉落空城青山繞

官解風雲淒已高歲月驚何邁陂田寒未收野水淺生
派晴林紫榴折霜日紅梨曬蕭疎喜竹勁寂寞傷蘭敗
叢菊如有情幽芳慰孤介嘉客日可攜寒醅美新醪登
臨無厭頻冰雪行即屆

司馬光秋意三首槐花滿庭

除籍籍不可掃稍疎邵平瓜漸熟王陽棗失時團扇棄

新進袷衣好日暮益愁思寒蟄起幽草忽聞秋興篇歎
賞幾絕倒 端居倦煩暑園圃久不窺雨餘秋氣新紅
葉生紫梨形骸得蕭散不知環堵卑何能效流俗把酒
須菊枝登高已可醉四野青雲垂 弱植生川澤托根
北堂後昔時青春姿扶踈映軒牖風霜日消落憔悴復
何有蠹穿枯節斷雨漬虛心朽幸不夭天年猶得勝凡
柳 陸游秋花歎秋花如義士榮悴相與同豈比輕薄
花四散隨春風黃菊抱殘枝寂寞卧寒雨拒霜更可憐

和帝浮煙浦古來結交意正要共死生讀我秋花詩可
代丹鷄盟 原明馮琦秋夜簡敬承公亮秋色遽如許客
心鬱未安微微日影薄肅肅天宇寬高風下木葉零露被
崇蘭四氣自斡運誰為衰盛端朱華曾幾何素萼忽已殘
楚楚松柏姿凌風以自完願言附高節與君同歲寒

七言古詩原唐無名氏秋月色驅秋下穹昊梁間燕語
辭巢蚤古苔凝紫貼瑤塔露槿啼紅墮江草越客羈魂
挂長道西風欲揭南山倒粉娥恨骨不勝衣映門楚碧

蟬聲老

增宋邵雍秋日飲後晚歸水竹園林秋更好

忍把芳樽容易倒重陽已過菊方開多情不學年光老
雲陰不動柳條低風遞輕寒梧葉槁無涯逸興不可收
馬蹄慢踏天街草元何中山中樂空山一夜生新雨

涼起賞心千萬緒扇團自守不依人桐葉知幾尋脫路
隔隴笑談雜樵牧臨流賓從惟鷗鷺旋庖蘆服美勝酥
精浙新杭香滿戶山中之樂誰得知我獨知之來何為
青林紅樹人煙濕護得金橙密處垂

五言律詩

御製禁園秋霽
樹冷催蟬咽
荷疎表影長
深秋殘暑氣微爽
待高陽戶外遠
塵蹟園中多
蕙香溶溶
新雨霽吟之愧成章

增唐太宗秋日翠微宮秋光凝翠嶺涼吹肅離宮
荷疎一蓋缺樹冷半帷空側陣移鴻影圓花釘菊叢
攄懷俗塵外高眺白雲中
秋日二首
菊散金風起荷疎玉露圓
將秋數行鴈離夏樂林蟬雲凝愁半嶺霞碎纈高天

還似成都望直見
我眉前
爽氣澄蘭沼
秋風動桂林

露凝千片玉
菊散一叢金
日岫高低影
雲空點綴陰
蓬

瀛不可望
泉石且娛心
王維山居秋暝
空山新雨後

天氣晚來秋
明月松間照
清泉石上流
竹喧歸浣女
蓮

動下漁舟
隨意春芳歇
王孫自可留
原李白秋登宣

城謝朓北樓
江城如畫裏
山曉望晴空
兩水夾明鏡
雙

橋落彩虹人
煙寒橘柚秋
色老梧桐誰念北樓上
臨風

懷謝公
包佶秋日過徐氏園林
回塘分越水
古樹積

吳煙埽竹催鋪席垂蘿待繫船
鳥窺新罅栗龜上半敲
蓮屢入忘歸地長嗟俗事牽
增白居易答劉戒之早

秋別墅見寄涼風木槿籬
暮雨槐花枝併起
新秋思為得故人詩
避地鳥擇木入朝魚在池中
與山下喧靜閣相思
許渾早秋遙夜泛清瑟
西風生翠蘿殘螢委

玉露早鴈拂金河
高樹曉還密
遠山晴更多
淮南一葉下
自覺老烟波
雍陶和劉補闕秋園寓興
水木多陰

冷池塘秋意多
庭風吹故葉
苔露淨寒莎
愁鴈窺燈語

情人見月過砧聲聽已別蟲響復相和 閉門無事後

此地即山中但覺鳥聲異不知人境同晚花開為雨殘
果落因風獨坐還吟酌詩成酒已空 秋色庭蕪上清

朝見露華踈篁抽晚笋幽藥吐寒芽引水新渠淨登臺
小徑斜人來多愛此蕭爽似仙家 禁掖朝迴後林園

勝賞時野人來辨藥庭鶴往者暮晚日明丹棗朝霜潤
紫梨還因重風景猶自有秋詩 鄭谷郊野蓼水菊籬

邊新晴有亂蟬秋光終寂寞晚醉自留連野濕禾中露

村閑社後天題詩滿紅葉何必浣花牋
宋邵雍秋夜

浮雲一消散星斗粲長天碧蘚墜丹果清香生白蓮體
涼猶衣葛耳靜已無蟬坐久羣動息秋空唯寂然
歐

陽修秋郊曉行寒郊桑柘稀秋色曉依依野燒侵河斷
山鴉向日飛行歌採樵去荷鋤刈田歸林酒家家熟相
邀白竹扉
陸游新秋秋氣入清笳旗亭酒可賒長歌

穿小市短帽插幽花溪女留新蟹園公餉晚瓜誰知閑
老子解作醉生涯
金趙夙秋郊晚望桃竹猶堪杖幽

尋興頗嘉池荷能幾葉籬菊不多花地坼成龜兆林枯
出犬牙村農慶豐歲社鼓已三過

師拓曲江秋望山

遠嶂重出野平天四圍涼風芟實坼久雨藕花肥水澗
漁舟小天長去鳥微紫蒲行處有采采莫盈衣 元德明
山中秋夕黃卷存餘習青燈共晚涼只知書味永不覺

鬢絲長老檜千年物幽蘭一國香平生陶靖節此夕邈
相望 明仁宗江樓秋望遠碧接天涯登臨景自佳巔
洲晴亦雪楓岸晝常霞落鴈過前浦浮鷗傍淺沙竹籬

高矚網茅屋是漁家

秋風玉律轉清商金飈送晚涼

輕飄梧葉墜暗度桂花香月下生林籟天邊展鴈行吹
噓禾黍熟萬頃似雲黃

原張祥鸞秋望快閣臨飛鳥

遙天入斷峰白雲山面面紅葉樹重重空翠當杯落晴
光刺眼濃願言隨楚客木末採芙蓉

七言律詩增唐溫庭筠郊居秋日稻田鳧鴈滿晴沙釣

渚歸來一逕斜門帶果林招邑吏井分蔬圃屬鄰家畢
原寂歷垂禾穗桑竹參差映豆花自笑謾懷經世策不

將心事許煙霞

原趙嘏長安秋夕

雲物淒涼拂曙流

漢家宮闕動高秋
殘星幾點鴈橫塞
長笛一聲人倚樓
紫豔半開籬菊靜
紅衣落盡渚蓮愁
鱸魚正美不歸去
空戴南冠學楚囚

韋莊秋日早行上馬蕭蕭襟袖涼

路穿禾黍繞宮牆
半山殘月露華冷
兩岸野風蓮萼香
煙外驛樓紅隱隱
渚邊雲樹暗蒼蒼
行人自是心如火
兔走烏飛不覺長

增元何中秋懷采采蘋花可佩香

依依橘柚未全黃
人行塞北非征戍
鴈過江南有稻粱

短笛疎鐘來別浦，亂鴉飛鷺過斜陽。西風擾擾知何似，
看見黃花滿地霜。

明陸樹聲

獨憐秋色倍清幽，花月

娟娟夜氣浮。滿院風飄香欲散，一天雲淨影交流。光搖
皓魄庭如水，寒染霜葩玉作毬。把酒啜英誇二美，賞心
還以繼前修。

五言排律增唐太宗秋日即事
爽氣浮丹闕，秋光澹紫

宮。衣碎荷疎影，花明菊點叢。袍輕低草露，蓋側舞松風。
散岫飄雲葉，迷路飛煙鴻。砌冷蘭凋佩，閨寒樹殞桐。別

鶴棲琴裏離猿啼峽中野落飛星箭弦虛半月弓芳菲
夕霧起暮色滿房櫳 盧照鄰山林休日田家歸休乘
暇日饁稼返秋場徑草疏王篁巖枝落帝桑耕田虞訟
寢鑿井漢機忘戎葵朝委露齊東夜含霜南澗泉初冽
東籬菊正芳還思北牕下高卧偃羲皇

五言絕句增唐王績秋夜喜遇王處士北場芸藿罷東
臯刈黍歸相逢秋月滿更值夜螢飛 原李白綠水曲
綠水明秋月南湖採白蘋荷花嬌欲語愁殺盪舟人

錢翊江行萬木已清霜江邊村事忙故溪黃稻熟一夜

夢中香

七言絕句原唐吳融涼思松間小檻接波平月淡煙沉
暑氣清半夜水禽棲不定綠荷風動露珠傾

增李商

隱到秋扇風浙瀝葦流離萬里南雲滯所思守到清秋
還寂寞葉丹苔碧閉門時

宋秦觀秋辭二首雲惹低

空不更飛班班紅葉欲辭枝秋光未老仍微暖恰似梅
花結子時 無數青莎繞玉堦夕陽紅淺過牆來西風

莫道無情思未放芙蓉取次開
范成大秋日碧蘆青

柳不宜霜染作滄洲一帶黃莫把江山誇北客冷雲寒

水更荒涼
陸游秋懷園丁傍架摘黃瓜村女沿籬采

碧花城市尚餘三伏熱秋光先到野人家
金高士談

楊休烈村居籬落牽牛放晚花西風吹落滿人家閉門

久雨青苔滑時見鴛鴦下白沙
柿葉經霜菊在溪天

寒落日見雞棲西家有客筇新酒紅葉蕭蕭蓋芋畦

趙元秋日禾穗累累豆角稠松前村落太平秋熙熙多

少豐年意都在農家社案頭

元郭鈺秋辭鶴認琪花

欲下遲蓬萊仙客遣催詩情深寫到相思處秋露芙蓉

開滿池

明世宗秋日即事

拂暑金風動袞裳滿天商

吹助新涼農家萬寶收成後十里遙聞禾黍香

陳繼

儒草綠蘋香穀水紋秋山寂寂冷斜曛庭前雙桂牕留

影時宿寒鴉與斷雲

秋老江瀕漾夕空蕭蕭楓葉挂

疎紅那知三泖清秋思偏寄蘆花一寺中

詩散句增宋鮑照

氣交蓬門疎風數園草殘

梁簡文

帝池蓮翻罷葉露篠生寒條

蕭愨芙蓉露下落楊柳

月中疎

周王褒苑寒梨樹紫山秋菊葉黃

庾信殘

秋欲屏扇餘菊尚浮杯

唐太宗露結林疎葉寒輕菊

吐滋 霜翦涼地蕙風捎幽渚荷

盧照鄰窮巷秋風

葉空庭寒露枝

李義府關樹凋涼葉塞草落寒花

張說汀葭變秋色津樹入寒煙

蘇頌落暉隱桑柘秋

原被花實

李嶠梧桐稍下葉山桂欲開花

李白一

為滄浪客十見紅渠秋

張均洲白蘆花吐園红柿葉

稀 尹恣風秋樹色雜苔古石文斑 司空曙花酣蓮

報謝葉在柳呈疎 韓翃蕙葭露下晚菡苔水中秋

風翦荷衣碎霜迎粟罅開 李商隱秋應為紅葉雨不

厭青苔 桐槿日零落雨餘方寂寥 溫庭筠江館白

蘋夜水關紅葉秋 李咸用柳葉飄乾翠楓枝撼碎紅

數花離菊晚片葉井梧秋 許渾葦花迷夕棹梧葉

散秋砧 方干細雨蓮塘晚疎蟬橘岸秋 徐鉉雨久

莓苔紫霜濃薜荔紅 宋邵雍紅葉戰西風黃花笑寒

日 陸游秋色滿江干江楓已半丹 元吳萊梧桐老

葉恨芙蓉新蕊愁 吳師道紅惜芙蓉落青憐薜荔生

明謝榛閨庭秋一色滿架豆花垂 唐韓翃風吹山

帶遙知雨露濕荷花已報秋 溫庭筠三秋岸雪花初

白一夜林霜葉盡紅 韓偓楓葉微紅近有霜碧雲秋

色滿吳鄉 稻壟蓼紅溝水清荻園葉白秋日明 宋

秦觀莫誇春色欺秋色未信桃花勝菊花 陸游夕露

正看沾草棘晨霜已見落楸槐 揚萬里秋風畢竟無

多巧只把燕支滴蓼花

金辛愿 煙迷短草秋還綠露

濕寒花晚更香

元仇遠

山分秋色歸紅葉風約蘋香

入畫船

蕭國寶 丹楓葉落霜初肅白葦花開月倍明

周權 梧葉庭除秋漸老豆花籬落晚初晴

明沈德

符統林行藥挈軍持小插秋花寄遠思

原文徵明 江

空露下芙蓉葉月出風吹桂樹枝

陳繼儒 疎菊籬邊

如待酒芟荷池上可為衣

王象晉 禾黍滿場堆玉粒

橘橙弄色挂金壘

增晉謝朓 秋町鬱蒙茸

周庚信

霜天林木燥

陳徐陵江秋岸荻黃

唐李白木落識

歲秋 秋風生桂枝 清秋凋碧柳

韓翃秋江落葉

遲 李咸用薄日朦朧秋

李濤秋槐滿地花

于濆

秋沼生荷芰

杜甫清秋幕府井梧寒

司空曙菊花

楓葉向誰秋

李益柿葉翻紅霜景秋

李商隱秋日

當階柿葉陰

鄭谷紅葉黃花秋景寬

杜荀鶴秋水

鷺飛紅蓼晚

宋蘇軾楓葉蘆花秋興長

秦觀雨荷

風蓼不勝秋

元稹顯黃花有恨驚秋老

趙孟頫露

下碧梧秋滿天

張雨秋在梧桐疎處多

明孫太初

菰米蓮房作好秋

詞原明劉基眼兒媚煙草淒淒小樓西雲壓雁聲低兩

行疎柳一絲殘照數點鴉棲春山碧樹秋重綠人在

武陵溪無情明月有情歸夢回到幽閨增宋劉鎮念

奴嬌嫩涼生曉怪今朝湖上秋風無迹古寺桂香山色

外腸斷幽叢金碧驟雨俄來蒼煙不見苔徑孤吟屐繫

船高柳晚蟬咽破愁寂且約攜酒高歌與鷗相好分

坐漁磯石算只藕花知我意猶把紅芳留客樓閣空濛
管絃清潤一水盈盈隔不如休去月懸良夜千尺

別錄原千金方秋宜食黍桃蔥 秋耕宜早恐霜後掩
入陰氣 收五穀擇吉日上倉先祭倉神 收藏鮮果
梨橘之類帶枝插蘿蔔或芋中仍用紙或乾穰草包護
窰勿通氣

七月 立秋七
夕附見

增禮記月令孟秋之月日在翼昏建星中旦畢中註日

月會于鶉尾而斗建申之辰也 涼風至白露降 是

月也農乃登穀天子嘗新先薦寢廟註黍稷之屬于是

始熟 命百官始收歛註順秋氣收歛物 原梁元帝

纂要七月曰孟秋首秋初秋上秋肇秋蘭秋又曰涼月

花月令是月也桐報秋木槿榮紫薇映月蓼紅菱實

雞冠報曉 增瓶史月表七月花盟主紫薇蕙花花客

卿秋海棠重臺朱槿花使令波斯菊水木香矮雞冠向

日葵

彙考原詩豳風七月食瓜 七月烹葵及菽 增夏小

正七月莠藿葦傳未莠則不為藿葦莠然後為藿葦故
先言莠 湟潦生革莢死革秀傳湟潦生革也者湟下
處也有湟然後有潦潦而後有革草也莢也者猶疏也
革也者馬帚也 初昏織女正東鄉時有霖雨灌茶傳
灌聚也茶藿葦之莠也為蔣楮之也藿未莠為茨葦未
莠為蘆 晉書樂志七月之辰謂為申申者身也言時
萬物身體皆成就也 七月之管名為夷則夷平也則

法也謂萬物將成平均皆有法則也 秦中歲時記進

士下第當年七月復獻新文求拔解故曰槐花黃舉子

忙 水衡記 荻苗水七月八月莢花故以名 夢溪筆

談七月百穀成實自能任持故曰太乙 賞心樂事七

月餐霞軒五色鳳仙花玉照堂玉簪西湖荷花南湖觀

魚應鉉堂東葡萄霞川水葑珍林剝棗 浴聞記河中

鳳林關有靈巖寺七月十五日溪穴流聖柰出大如琰

楚志水陸寺在沔江深不可測名蓮花潭於初秋良

夜有蓮花豔出水面香浮襲人

立秋增禮記月令是

月也以立秋先立秋三日太史謁之天子曰某日立秋
盛德在金天子乃齋立秋之日天子親帥三公九卿諸
侯大夫以迎秋于西郊

要覽列子御風常以立春歸

乎八荒立秋遊乎風穴是風至草木皆生否則搖落謂
之離合風

東京夢華錄立秋日滿街賣楸葉婦女兒

童輩皆翦成花樣戴之是月瓜果梨棗方盛京師棗有
數品靈棗牙棗青州棗亳州棗雞頭上市則梁門裏李

和家最盛中貴戚里取索供賣內中泛索金合絡繹士
庶買之一裹十文用小新荷葉包糝以麝香紅小索兒
繫之賣者雖多不及李和一色揀銀皮子嫩者貨之

熙朝樂事立秋之日男女咸戴楸葉以應時序或以石
楠紅葉翦刻花瓣插鬢邊或以秋水吞赤小荳七粒

七夕增荆楚歲時記七月七夕人家婦女結綵縷穿七

孔鍼陳瓜果于庭中以乞巧有喜子網於瓜上則以為
符應 風土記或問董勛七日為良日飲食不同于古

何也勛曰七月黍熟七曰陽數故曰珍糜今惟設湯餅
不復有糜矣

說林

七月七日陳豐以青蓮子十枚寄

葛勃勃啖未竟墜一子於盆水中有喜鵲過惡汙其上
勃遂棄之明早有並蒂花開於水面如梅花大取置几
頭數日始謝房亦漸長剖之各得實五枚如豐來數自
是鄉人改雙星節為雙蓮節

原東京夢華錄七月七

夕以小板傳土旋種粟令生苗置小茅屋花木作田舍
家小人物皆村落之態謂之穀板又以瓜雕刻成花樣

謂之花瓜又以菜豆小豆小麥於磁器內以水浸之生
芽數寸以紅藍綵縷束之謂之種生皆於街心設綵幕
帳貨賣前三五日車馬盈市羅綺滿街旋折未開荷花
都人善做假雙頭蓮取玩一時提攜而歸又小兒須買
新荷葉執之蓋效顰磨喝樂至初六日七日晚貴家多
結綵樓於庭鋪陳磨喝樂花瓜酒焚香列拜謂之乞巧
五色線仙子云天寶六載侍輦驪山七夕夜張錦繒
樹瓜花陳飲食焚香於庭拜縷針絳線 致虛閣雜俎

薛瑤英於七月七日令諸婢共翦輕綵作連理花千餘
朶以陽起石染之當午散於亭中隨風而上徧空中如
五色雲霞久之方沒謂之渡河吉慶花藉以乞巧 七
夕徐婕妤雕鏤菱藕作竒花異鳥攢於水晶盤中以進
上極其精巧上大稱賞賜以珍寶無數上對之竟日喜
不可言至定昏時上自散置宮中几上令宮人暗中摸
取以多寡精麤為勝負謂之鬪巧以為歡笑 誠齋雜
記蔡州丁氏女精於女紅每七夕禱以酒果忽見流星

墜筵中明日瓜上有金梭自是巧思益進
常氏日錄

七日將午時酒服菖蒲一二寸飲酒不醉

集藻文賦散句增晉盧湛感運賦氣激激而浸冷霜微
微而日華翠葉紛以朝落朱華慘以夕捐
原梁昭明

太子錦帶書桂吐花于小山之上梨翻葉于大谷之中

唐王勃七夕賦玉繩湛色金漢斜光煙淒碧樹露濕

銀塘視蓮潭之變彩見松院之生涼引驚蟬于寶瑟宿

蘭燕于瑤筐
宋田錫早秋賦桐葉潛零下玉欄兮金

井桂花增麗鑿珠簾兮綺疏

四言古詩原晉潘尼七月七日侍皇太子宴商風初授
辰火微流朱明送夏少昊迎秋嘉禾茂園芳草被疇于
時秋游以豫以休

五言古詩原北周庾信奉和初秋落星初伏火秋霜正
動鐘北閣連橫漢南宮應鑿龍祥鸞棲竹實靈蔡上芙蓉
自有南風曲還來吹九重

唐李賀七月樂辭星依

雲渚冷露滴盤中圓好花生木未衰黃愁空園夜天如

玉砌池葉極青錢
僅厭舞衫薄
稍知花萼寒
曉風何拂
拂北斗光闌干

五言律詩

御製早秋新霽卷幔過
新雨披襟納好風
餘霞明遠岫
倒影
射晴虹
稼穡豐年足
乾坤爽氣同
高天雲斷處
歷歷見初
鴻

增唐太宗儀鸞殿早秋
寒驚薊門葉
秋發小山枝
松陰
背日轉竹影
避風移提壺
菊岸高興芙蓉池
欲知涼

氣早巢空燕不窺

宋邵雍和李文思早秋一雨洗觚

稜三川氣象清林風傳顥氣木葉送商聲忽忽蓮生葯

看看菊吐英太平時裏老何以報虛生 池畔拖垂柳

闌邊笑晚霞敗荷傾敝蓋老檜露枯槎歲暮驚時態年

高惜物華東陵風未替解憶故園瓜 陸游初秋藉草

沾衣露沿溪掠面風桐凋無茂綠蓮老有疎紅小釣歌

危度鄰園曲折通新秋得強健一笑莫匆匆

七言律詩

御製立秋前一日晚同左右間坐進鮮果偶作初到金風天
氣晚微涼雨後畫簾垂九重迥出白雲遠三殿高臨北斗
移珍果滿盤新獻節碧梧一葉報秋時漏深不寐題詩句
月色輝煌照鳳墀

增唐韋莊早秋夜作翠簾初清暑半銷撒簾松韻送輕
颺莎庭露永琴書潤山郭月明砧杵遙傍砌綠苔鳴蟋
蟀繞簾紅樹織蟪蛄不須更作悲秋賦王粲辭家鬢已
凋
明景氏翩翩七夕樓前蕭史憶吹簫鴈足西風倍

寂寥望斷支機應化石愁填烏鵲未成橋素毫月冷吟
梧葉紈扇秋回識柳條姊妹東鄰如乞巧莫教瓜果浪
相招

七言絕句增宋范成大七月十六日石湖路中書事白
葛烏紗稱老農溪南溪北水車風稻頭的皪黏朝露步
入明珠翠網中 立秋後二日泛舟越來溪西風初入

小溪帆旋織波紋縐淺藍行入鬧荷無水面紅蓮沉醉
白蓮酣 元趙雍初秋夜坐夜深庭院寂無聲明月流

空萬影橫坐對荷花三兩朵紅衣落盡秋風生

詩散句增唐鄭槩江南孟秋天稻花白如氈白居易

清風水蘋葉白露木蘭枝韋莊柿葉添紅影槐柯減

綠陰李商隱桂含爽氣三秋首賞吐中旬一葉新

宋陸游風生細葛無三伏月上疎林正四更

詞原宋歐陽修漁家傲七月新秋風露早渚蓮未折庭

梧老是處瓜花時節好金樽倒人間綵縷爭祈巧萬

葉敲聲涼乍到百蟲啼晚煙如掃漏箭初長天杳杳人

語悄那堪夜雨催清曉

別錄原占候有三卯田禾熟無則旱種麥

種植蘿蔔

白菜蕪菁芥菜秋黃瓜甜菜萵苣先萎水仙根苦蕒晚
紅花牛膝蔥烏菘臘梅子蜀葵韭澆灌桂樹忌澆橙

橘糞收採胡桃乾薑蘑菇斑猫浮萍楮實瞿麥刈藍

卷柏海棠覆盆子使君子畢澄茄麻子藕蔓荊子蔴黃
莖白薔薇刈芋芋石硫黃馬鞭草露蜂房石龍芮皮鼠
尾草甜瓜蒂天門冬眼子菜旋覆花白蒺藜荷葉槐實

藿香五加皮菱芡石韋蒺藜漆 整頓漚晚麻翻麥地

伐木斫竹 製用醬鳳仙莖製瓜壘曬葫蘆茄瓜乾

田忌天火午地火辰荒蕪亥九焦酉糞忌酉

八月

秋分中
秋附見

增禮記月令仲秋之月日在角昏牽牛中旦觜觶中註

日月會于壽星而斗建酉之辰也 天子乃難以達秋

氣以犬嘗麻先薦寢廟 乃命有司趣民收斂務蓄菜

多積聚乃勸種麥毋或失時其有失時行罪無疑 原

花月令是月也槐黃嬾笑芝草奏功桂香秋葵高掇金錢及第 增瓶史月表八月花盟主丹桂木樨芙蓉花客卿寶頭雞冠楊妃槿花使令水荭花翦秋羅牡丹花山茶花

彙考原詩幽風八月萑葦 八月其穫 八月斷壺

八月剝棗 增夏小正八月剝瓜傳剝瓜也者畜瓜之時也 剝棗桌零傳剝也者取也零也者降零而後取之故不言剝也 晉書樂志八月之辰謂為酉酉者猶

也謂時物皆納縮也 八月之管名為南呂南呂任也
謂時物皆秀有懷任之象也 續齊諧記鄧紹八月旦

入華山採藥見一童子執五綵囊盛柏葉上露如珠滿

囊紹問用此何為荅曰赤松先生取以明眼言終便失

所在 荆楚歲時記八月十四日以錦綵為眼明囊遞

相餉遺註按述征記云八月一日作五明囊盛取百草

頭露洗眼令眼明也 風土記里俗以八月雨為豆花

雨 夢溪筆談八月枝條堅剛故曰天罡 賞心樂事

八月湖山尋桂現樂堂秋花衆妙峰山木犀霞川野菊
綺互亭干葉木犀桂隱攀桂杏花莊鷄冠黃葵 成都

古今記八月有桂市 山家清事八月八日為竹醉曰

種竹易活 筍譜竹八月謂之小春熱欲去寒欲來故

曰小春 秋分增宋書律志秋分而禾標定標定而禾

熟律之數十二故十二標而當一粟一粟而當一寸

中秋增瑣碎錄中秋無月則兔不孕蚌不胎蕎麥不實

乾淳歲時記中秋夕禁中賞月延桂 通考八月十

五為移花日

禪林備覽有梵僧從天竺鷲山飛來云

八月十五日夜桂子落

清閭供八月十五日牡丹誕

集藻文賦散句原梁昭明太子錦帶書黃花笑冷白羽

悲秋既傳蘇子之書更泛陶公之酒 增元王柏長嘯

山游記辛卯秋八月與客游於北山於時丹楓纈林香

桂染袖金粟垂穎翠英吐芙蓉靚冶籬菊敷茂紫蘭

兮抗莖濯蕊於深幽香稻兮春玉簌珠於踐蹂懸顛苞

于棗栗粲青黃于橘柚日暄而不燬雨寒而不驟正一

年之佳景候也

五言古詩原晉孫綽秋日蕭瑟中秋日鴈唳風雲高山
居感時變遠客興長謠疎林積涼風虛岫結凝霄湛露
灑庭樹密葉亂繁條撫葉悲先落攀松羨後凋垂綸在
林野交情遠市朝澹然懷古心濠上豈伊遙

增唐白

居易南湖晚秋八月白露降湖中水方老旦夕秋風多
衰荷半傾倒手攀青楓樹足蹋黃蘆草慘淡老容顏零
落秋懷抱有兄在淮楚有弟在蜀道萬里何時來煙波

白浩浩

七言古詩增宋徐積八月十四夜有人望月吟太虛半
夜秋風吹碧蘆碧蘆風起吹老桂吟聲八月驚蟾蜍明
夜中秋更好吟兔肥蟾大桂成林桂兔之外有何物玉
池水到中秋溢秋風刮水如霜滴

五言律詩增唐廖凝中秋月九日秋色今宵已平分
孤光含列宿四面絕纖雲衆木排疎影寒流疊細紋遙
遙望丹桂心緒正紛紛

七言律詩原明蔡羽秋思清秋山色淨簾櫳八月芙蓉
滿鏡中醉任嶺雲連海綠愁禁楓葉接天紅養魚好伴
鴟夸子飲水如無桑苧翁江上美人期不到吹簫獨自
向虛空

七言絕句原宋韓琦仲秋八日雲臺觀羣花盛開春早
凡花百種榮秋芳能得幾多名仙家八月靈葩發不與
尋常俗豔爭

別錄原占候有三卯三庚低田麥稻吉三庚二卯麥宜

高田無三卯不宜麥諺云三卯三庚麥出低坑三庚二卯麥出均巧 月大盡有水災少菜 月令通考秋分

諺曰分社同一日低田盡叫屈秋分在社前斗米換斗

錢秋分在社後斗米換斗豆 朔日值白露果穀不實

值秋分主物價貴 十一日卜來年水旱侵晨或隔夜

于水邊無風浪處作一水則子至晚看之若沒主水露

主旱平主小水又主本年好種麥名曰橫港 增農政

全書八月朔日風雨宜麥麻子貴十倍又云凡朔要晴

惟此日要雨好種麥 諺曰白露前是雨白露後是鬼
其時之雨片雲來便雨稻花見日吐出陰雨則收正吐
之時暴雨忽來卒不能收遂致白颯之患若連朝雨反
不為災 種植箭幹菜豌豆蠶豆萵苣麥水晶蔥蘿蔔

芥菜蔓菁蒜春菜菠菜油菜白菜薺紅花烏菘胡荽胡
麻雞頭蔥木瓜罌粟黃矮菜芍藥菱 移植櫻桃橘李
柚枇杷柑杏梅銀杏桃梔子芍藥枸杞木犀梧桐橙牡
丹玫瑰丁香木筆石菊百合水仙山丹 壓插玫瑰薔

薇

貼接牡丹綠萼梅海棠

澆灌牡丹瑞香芍藥並

宜猪糞

收採割殺著實根

豇豆石楠實大棗狼毒

牛膝韭花金毛狗脊人參酸棗山藥桔梗牡丹皮根薏

苡草龍膽白欽當歸白蒺藜升麻芍藥根柴胡黃芩烏

藥根秦艽生地澤瀉巴戟天白蘚皮甘草白朮黃連萱

草根香附子百合知母玄參天門冬山豆根地榆防己

前胡茅香苗胡黃連草薜桂皮茯苓神苧根蜀椒花椒甘

松茯苓丁香猪苓雷丸王不留行根苗花子藍種秦皮

虎杖巴豆角蒿

整頓修牡丹芍藥菊加土放芋根

鋤竹園蘭換盆刈芋忌澆橙橘

田忌天火酉地火卯

九焦午糞忌申荒蕪卯

九月 九日附見

增禮記月令季秋之月日在房昏虛中旦柳中註日月

會于大火而斗建成之辰也 鞠有黃華 命百官貴

賤無不務內以會天地之藏無有宣出 乃命冢宰農

事備收舉五穀之要 是月也草木黃落乃伐薪為炭

是月也天子以犬嘗稻先薦寢廟

原梁元帝纂要

九月曰季秋亦曰暮秋末秋暮商季商杪商又曰玄月

增花月令是月也菊有英巴竹筍芙蓉綻山藥乳橙

橘登老荷化為衣

瓶史月表九月花盟主菊花花客

卿月桂花使令老來紅葉下紅

彙考原詩幽風九月叔苴

夏小正九月榮鞠樹麥傳

榮鞠鞠草也鞠榮而樹麥時之急也

晉書樂志九月

之辰謂之戌戌者滅也謂時物皆衰滅也 九月之管

名曰無射射者出也言時陽氣上升萬物收藏無復出也
夢溪筆談九月木可為枝幹故曰太衡 九日增

西京雜記戚夫人侍兒賈佩蘭後出為扶風人段儒妻
說在宮內時九月九日佩茱萸食蓬餌飲菊花酒令人
長壽菊花舒時并採莖葉雜黍米釀之至來年九月九
日始熟就飲焉故謂之菊花酒 玉燭寶典九日食蓬

餌飲菊花酒者其時黍秫并收因以黏米嘉味觸類嘗
新遂成積習 太清記九月九日採菊花與茯苓松脂

久服之令人不老

原風土記九月九日律中無射而

數九俗尚此日折茱萸房以插頭言辟除惡氣為禦初

寒漢俗九日飲菊花酒以祓除不祥

續齊諧記汝

南桓景隨費長房游學累年長房謂曰九月九日汝家

中當有災宜急去令家人各作絳囊盛茱萸以繫臂登

高飲菊花酒此禍可除景如言舉家登山夕還見雞犬

牛羊一時暴死長房聞之曰此可代也今世人九日登

高飲酒婦人帶茱萸囊蓋始于此

續晉陽秋陶潛九

月九日無酒於宅邊菊叢中摘盈把坐其側望見白衣人乃王弘送酒即便就酌而後歸

增千金月令重陽

之日必以肴酒登高眺遠為時讌之遊賞以暢秋志酒必採茱萸甘菊以泛之既醉而還

原歲時雜記二社

重陽以棗為糕或加以粟以肉

洛陽風土記九日以

花糕法酒賜近臣

增賞心樂事重九登城把萸把菊

亭采菊蘇堤看芙蓉珍林嘗時果景全亭金橘芙蓉池

三色拒霜

東京夢華錄九月重陽都下貴菊有數種

其黃白色蕊若蓮房曰萬齡菊粉紅色曰桃花菊白而
檀心曰木香菊黃色而圓者曰金鈴菊純白而大者曰
喜容菊無處無之酒家皆以菊花縛成洞戶都人出郊
外登高宴聚前一二日各以粉麵蒸糕遺送摻飭果實
如石榴子栗黃銀杏松子之類

熙朝樂事重九日登

高飲燕者必簪菊泛萸猶古人之遺俗也又以蘇子微
漬梅滷雜和蔗霜梨橙玉榴小顆名曰春蘭秋菊

集藻書原魏文帝與鍾繇九日送菊書歲往月來忽復

九月九日九為陽數而日月並應俗嘉其名以為宜於
長久故以宴享高會是月律中無射言羣木庶草無有
射地而生惟芳菊紛然獨榮非夫含乾坤之純和體芬
芳之淑氣孰能如此故屈平悲冉冉之將老思餐秋菊
之落英輔體延年莫斯之貴謹奉一束以助彭祖之術
文賦散句原宋傅亮九月九日登凌囂館賦何物慘而
節哀又雲悠而風厲悴綠繁于寒渚隕豐翟于荒溼既
中原之芬菊惜蘭圃之凋蕙旌竹柏之勁心謝梧楸之

零脆 梁昭明太子錦帶書重陽變序節景窮秋霜抱
樹而擁柯風拂林而下葉金堤翠柳帶星采而均調紫
塞蒼鴻追風光而結陣

五言古詩原晉陶潛九日間居世短意常多斯人樂久
生日月依辰至舉俗愛其名露淒暄風息氣徹天象明
徃燕無遺影來鴈有餘聲酒能祛百慮菊解制頽齡如
何蓬廬士空視時運傾塵爵耻虛壘寒華徒自榮斂襟
獨閑謠緬焉起深情棲遲固多娛淹留豈無成

乙酉

歲九月九日靡靡秋已夕淒淒風露交蔓草不復榮園
木空自凋清氣澄餘滓杳然天界高哀蟬無留響叢鴈
鳴雲霄萬化相尋繹人生豈不勞從古皆有沒念之中
心焦何以稱我情濁酒且自陶千載非所知聊以永今
朝 增梁庾肩吾九日侍宴輟跡光周頌巡遊盛夏功
鈞陳萬騎轉閭闔九門通秋暉逐行漏朔氣繞桐風獻
壽重陽節迴鑿上苑中疏山開輦道間樹出離宮玉醴
吹巖菊銀牀落井桐御梨寒更紫仙桃秋轉紅飲羽山

西射浮雲翼北驄塵飛金埒滿葉破柳條空騰猿疑矯
箭驚鴈避虛弓彫材濫祀梓花綬接鷓鴻愧乏天庭藻
徒參文雅雄

陳江總於長安歸還揚州九月九日行

至薇山亭賦韻心逐南雲逝形隨北鴈來故鄉籬下菊
今日幾花開

唐太宗山閣晚秋山亭秋色滿巖牖涼

風度疎蘭尚染煙殘菊猶承露古石依新苔新巢封古
樹歷覽情無極咫尺輪光暮

原宋梅堯臣九日永叔

長文原甫景仁鄰幾持國過飲秋堂雨更靜粲粲佳菊

芳置酒延羣公掇英浮新黃心猶慕淵明歸來醉柴桑
莫問車馬之去跡亂康莊

蘇軾九日間居和陶詩九

日獨何日欣然愜平生四時靡不佳樂此古所名龍山
憶孟子粟里懷淵明鮮鮮霜菊豔溜溜糟牀聲間居知
令節樂事滿餘齡登高望雲海醉覺三山傾長歌振履
商起舞帶索榮坎軻識天意淹留見人情但願飽杭稌
年年樂秋成

五言律詩

御製九日幸景山登高秋色淨樓臺登高紫禁隈千門鳴雁
度萬井霽煙開翠拂鑿輿上雲隨豹尾來佳辰欣宴賞滿

泛菊花杯

原唐中宗九月九日幸臨渭亭登高九日正乘秋三杯
興已周汎桂迎樽滿吹花向酒浮長房萸早熟彭澤菊
初收何藉龍沙上方得恣淹留

增王績九月九日野

人迷節候端坐隔塵埃忽見黃花吐方知素節回映巖
千段發臨浦萬株開香氣徒盈把無人送酒來

崔善

為荅王無功九日秋來菊花氣深山客重尋露葉疑涵
玉風花似散金摘來還泛酒獨坐即徐斟王弘貪自醉
無復覓楊林 原沈佺期九日侍宴應制御氣幸金方

憑高薦羽觴魏文頒菊蕊漢武賜萸囊去鶴留笙吹歸
鴻識舞行年年重九慶日日奉天長 杜甫九日舊日

重陽日傳杯不放杯即今蓬鬢改但媿菊花開北闕心
長戀西江首獨回茱萸賜朝士難得一枝來 九日曲

江綴席茱萸好浮舟菑菑衰季秋時欲半九日意兼悲

江水清源曲荆門此路疑晚來高興盡搖蕩菊花期

七言律詩原唐張諤九日秋天林下不知春一種佳遊

事也均絳葉從朝飛著夜黃花開日未成旬將橫陌樹
頻驚馬半醉歸途數問人城遠登高併九日茱萸凡作

幾年新

杜甫九日藍田崔氏莊老去悲秋強自寬興

來今日盡君歡羞將短髮還吹帽笑倩傍人為整冠藍
水遠從千澗落玉山高並兩峰寒明年此會知誰健醉
把茱萸仔細看
嚴維九日登高詩家九日憐芳菊逐

客高齋瞰浙江漁浦浪花搖素壁西陵樹色入秋牕木
奴向熟懸金實桑落新開瀉玉缸四子醉時爭講德笑
論黃霸屈為邦

增宋韓琦壬子重九菊有黃花氣候

移重陽香萼已乾枝金鈴後坼孤芳在玉液輕浮一醉
宜煙渚去來鴻自適霜叢飛遶蝶何知風前客帽從吹
落且伴山翁倒接羅

邵雍秋暮西軒遶欄種菊一齊

芳戶牖軒牕總是香得意不能無興詠樂時况復遇豐
穰深秋景物隨宜好向老筋骸羸且康飲罷何妨更登

眺爛霞堆裏有斜陽

楊萬里九日即事呈尤延之昨

日茱萸未苦香今朝籬菊頃然黃浮英泛蕊多多著舊
酒新醕細細嘗節裏且追千載事鬢邊管得幾莖霜正
冠落帽多兒態自笑狂夫老不狂 金姚孝錫重九天
邊今日又重陽隴樹紅飛鴈信霜且插茱萸慰衰鬢莫
將詩句抗迴腸歌勤皓齒人俱醉舞戀晴暉蝶也忙來
日預期扶宿酒未應籬菊減秋香

五言排律原唐高宗九月九日端居臨玉宸初律啟金

商鳳闕澄秋色龍闈引夕涼野靜山氣斂林疎風露長
砌蘭窺半影巖桂發全香滿蓋荷凋翠圓花菊散黃揮
鞭爭電烈飛羽亂星光柳空穿石碎弦虛側月張怯猿
啼落岫驚鴈斷分行斜輪低夕景歸旆擁通莊 沈佺

期白蓮花亭侍宴應制九日陪天仗三秋幸禁林霜威

變綠樹雲氣落青岑水殿黃花合山亭絳葉深朱旗夾
小徑寶馬駐青澗花史收寒果饗人膳野禽承歡不覺
暝遙響素秋砧 增王維奉和聖製重陽節宰臣及羣

官上壽應制四海方無事三秋大有年百生逢此日萬
壽願齊天芍藥和金鼎茱萸插玳筵玉堂開右个天樂
動宮懸御柳疎秋景城鴉拂曙煙無窮菊花節長奉柏
梁篇

五言絕句增唐王勃九日九日重陽節開門有菊花不
知來送酒若箇是陶家原李白九日龍山飲九日龍

山飲黃花笑逐臣醉看風落帽舞愛月留人九月十

日即事昨日登高罷今朝更舉觴菊花何太苦遭此兩

重陽

杜甫復愁

每恨陶彭澤無錢對菊花
如今九日

至自覺酒須賒

增金字文虛中回文詩
短葦低殘雨

虛舟帶晚潮斷鴻歸暗浦
疎葉墮寒梢

感感蛩吟苦

茫茫水驛孤日銜山色
暮霜帶菊叢枯

明馬氏間卿

暮秋野色滿園中
閒情立晚風
菊花含雨豔
楓葉醉霜

紅

七言絕句原唐張諤九日宴秋葉風吹黃颯颯
晴雲日

照白鱗鱗歸來特問茱萸女
今日登高醉幾人

增王

維九月九日憶山東兄弟獨在異鄉為異客每逢佳節
倍思親遙知兄弟登高處遍插茱萸少一人
宋韓琦

重九會光化二園誰言秋色不如春及到重陽景自新
隨分笙歌行樂處菊花萸子更宜人
王安石九日九

日無歡可得追飄然隨意歷山陂蔣陵西曲風煙慘也
有黃花一兩枝
陸游九月晦日作菊枝傾倒不成叢

桐葉凋零已半空自是老來多感慨不須蕭瑟為秋風
炊煙漠漠衡門寂寒日昏昏倦易還數樹丹楓映蒼

檜天工解作范寬山

秋晚新築場如鏡面平家家歡

喜賀秋成老來懶惰慚丁壯美睡中聞打稻聲

秋晚

雜興汀樹猶青未著霜壠間稗穗已先黃放翁皓首歸
民籍爛醉狂歌坐箬牀冷落秋風把酒杯半酣直欲

挽春回今年菰菜嘗新晚正與鱸魚一味來金張本

九日月中對菊花上清光花下陰素娥惜此萬黃金一
杯寒露三更後誰信幽人更苦心

詩散句原齊王儉寥寥清景靄靄微霜草木搖落幽蘭

獨芳

梁沈約暮芝始綠年桂初丹上林葉下滄池水

寒

葉浮楚水草折梁園淒涼霜野惆悵晨鷗

丘遲

雲物游颺光景高麗枯葉未落寒花委砌

唐李白今

日雲景好水綠秋山明攜壺酌流霞寒菊汎寒榮

白

居易黍香酒初熟菊暖花未開間聽竹枝曲淺酌茱萸

杯

陳江總園菊把黃花庭榴割朱實

原隋賀散寒

花低岸菊涼葉下庭梧

增唐張錫菊彩揚堯日萸香

送舜風

蕭至忠寵極萸房遍恩深菊酌餘

樊忱插

萸登鷺嶺把菊坐蜂臺

趙彥伯簪挂丹萸蕊杯浮紫

菊花

原宋之間時菊芳仙醞秋蘭動睿篇

蘇瓌菊

氣先薰酒萸香更襲衣

孫佺應節萸房滿初寒菊圃

新

高適絳葉擁虛砌黃花隨濁醪

陰行先山棠紅

葉下岸菊紫花開

蔣山卿歲熟村多釀秋深菊始華

韋莊水館紅蘭合山城紫菊深

白居易江南九月

未搖落柳青蒲綠稻穠香

司空圖重陽未到已登臨

探得黃花且獨斟

增宋周必大遙知九日平山會笑

插茱萸滿鬢紅

陸游但憶社醅接菊蕊敢希朝士賜

萸枝

金周昂猶賴多情數枝菊肯留金蕊待重陽

原元即律楚材鴈門九日西風高綿梨萬樹垂金綃

增曾伯啓蕎花不識秋光老猶向桑陰密處開 唐巖

維菊度重陽少 殷璠重陽開滿菊花金 杜荀鶴重

陽酒熟茱萸紫

詞原明陳繼儒昭君怨記得東坡老叟莫負清明重九

今日正重陽菊花黃 花插滿頭歸去落日村楓樹

樹裏唱歌聲釣漁人
增金李俊民點絳脣秋樹風高

可憐憔悴門前柳白衣去後閒却持杯手
一笑相逢

落帽年時友君知否南山如舊人比黃花瘦
宋蘇軾

浣溪沙珠檜絲杉冷欲霜山城歌舞助淒涼且餐山色

飲湖光
共挽朱轡留半日強揉青蕊作重陽不知明

日為誰黃
黃機清平樂西風獵獵又是登高節一片

情懷無處說秋滿江頭紅葉
誰憐鬢影淒涼新來更

點吳霜辜負萸囊菊盞年年客裏重陽
原李易安醉

花陰薄霧濃雲愁永晝瑞腦噴香獸時節又重陽玉枕
紗厨半夜涼初透東籬把酒黃昏後有暗香盈袖莫
道不消魂簾捲西風人似黃花瘦

黃庭堅鷓鴣天黃

菊枝頭破曉寒人生莫放酒杯乾風前橫笛斜吹雨醉
裏簪花倒著冠身健在且加飧舞裙歌板盡清歡黃
花白雪相牽挽付與時人冷眼看

蘇軾南鄉子霜降

水痕收淺碧粼粼露遠洲酒力漸消風力軟颼颼破帽
多情却戀頭詩酒若為儔但把清樽斷送秋萬事到

頭都是夢休休明日黃花蝶也愁

歐陽修漁家傲九

日歡遊何處好黃花萬蕊雕欄透通體清香無俗調天
氣好煙滋露結功多少日脚清寒高下照寶釘密綴
圓斜小落葉西園風嫋嫋催秋老叢邊莫厭金樽倒

又九月霜秋秋已盡烘林敗葉紅相映惟有東籬黃菊
盛遺金粉人家簾幕重陽近曉日陰陰晴未定授衣
時節輕寒嫩新鴈一聲風又勁雲欲凝鴈來應有吾鄉

信

別錄原種植大小麥油菜豌豆水仙春菜芫荽蒿苣白

菜冬瓜蒜芥菜罌粟

移植牡丹芍藥萱草山茶臘梅

麗春玫瑰竹諸果木

收採五倍子五穀種菊花薔薇

子芝麻稗木瓜乾薑兔絲子大豆杜仲白朮粟厚朴芎

藟橄欖茱萸梔子阜茨阜角茶子豆稽茄種松節抓抓

兒 整頓採菊花鋤蓆草掘薑糞麥門冬刈紫草收子

刈苔蒂掘芋收苧麻子去荷葉缸水

製用本草凡棗

用九月採日乾補中益氣久服神仙以其月採太乙餘

糧久服耐寒暑不饑輕身可醃諸色菜及造茭白藕蘿
蔔葫蘆諸生鮓作香茄蒜茄蒜東瓜芥菴田忌天火
子地火寅糞忌巳九焦寅荒蕪未

御定佩文齋廣羣芳譜卷五